


柳田文庫
文庫11
D 289
1



元舞

文庫11
D289
1

010190563877

宣統三年
板藏層漪堂

元書目錄卷首

卷一 本紀第一

太祖

卷二 本紀第二

太宗

卷三 本紀第三

定宗

卷四 本紀第四

憲宗

卷五 本紀第五

世祖 上下

卷六 本紀第六

元書

卷首目錄

藏書

成宗

卷七 本紀第七

武宗

卷八 本紀第八

仁宗

卷九 本紀第九

英宗

卷十 本紀第十

泰定帝

卷十一 本紀第十一

天順帝

卷十二 前紀第十二

文宗

卷十三 本紀第十三

明宗

卷十四 本紀第十四

文宗

卷十五 本紀第十五

順帝

卷十六 志第一

稗象

卷十七 志第二

寰宇

卷十八 志第三

元書

卷首目錄

二

河渠

卷十九 志第四

禮樂

卷二十 志第五

郊祀

卷二十一 志第六

選舉

卷二十二 志第七

職官

卷二十三 志第八

藝文

卷二十四 志第九

食貨

卷二十五 志第十

兵刑

卷二十六 列傳第一

后妃

太祖母宣懿太后

也速干皇后 公主皇后

昭慈皇后

憲宗母顯懿莊聖太后

貞節皇后

昭睿順聖皇后

成宗貞慈靜懿皇后

太祖光獻翼聖皇后

忽蘭皇后 也速皇后

太宗孛納合真皇后

定宗欽淑皇后

憲宗火里差皇后

世祖帖木倫大皇后

成宗母徽仁裕聖太后

元書

卷首 目錄

三

武宗母昭聖元獻太后

武宗宣慈惠聖皇后

仁獻章聖皇后

文獻昭聖皇后

仁宗莊懿慈聖皇后

英宗莊靜懿聖皇后

泰定帝宏吉刺皇后

明宗乃馬真皇后

貞裕徽聖皇后

文宗宏吉刺皇后甯宗宏吉刺皇后

順帝伯牙吾皇后

宏吉刺皇后

肅良合皇后

卷二十七 列傳第二

始祖以來諸族

始祖父朵魯班氏

始祖四兄 別訥古納台氏 不忽訥合 哈答斤氏 散

只朮氏純只海

八林昔黑刺禿哈必蓄二弟

巴阿鄰氏豁兒赤 兀孫 闊闊擲 思 失兒古額子納牙

沼列兀台氏玉律 抄兀兒

既拏都兒罕六弟 那牙勒氏 巴魯刺思氏 大巴魯刺

氏 小巴魯刺氏 阿答兒斤氏 不答安惕氏 兀魯兀

台氏 忙忽氏

拜姓忽兒二弟 泰赤烏氏 別速台氏窟出活兒 斡羅納氏

乞失里 晃豁壇氏明里也赤哥 雪亦客禿 阿魯刺惕氏 雪你惕氏 合

卜禿兒合忽氏 格泥格思氏

八里丹兄主兒乞氏薛徹別吉 薛徹大丑

八里丹五弟 忽都魯哱聶兒子播里 忽魯刺汗子擲只 按彈

忽闌八都兒子亦客扯連 掇端斡赤斤

烈祖二兄 蒙哥覩黑顏子汪古兒 聶坤大司子火察兒

烈祖弟苔里眞

孫甯海王闊闊出 裔孫益王買奴

卷二十八 列傳第三

塔塔兒

泰赤烏

札苔刺

克烈

蔑里乞

乃蠻

乞力吉思

卷二十九 列傳第四

耶律留哥

子辭閣

蒲鮮萬奴

張鯨

弟致

石珪

子天祿

李全

子壇 張林

嚴實

子忠濟 忠嗣 忠範 張晉亨 王 玉汝 齊顯榮 趙天錫

卷三十 列傳第五

烈祖四王

撈只哈兒王

子淄川也 苦也 苦弟 移相哥大王 移相哥子 勢都兒王 勢都兒子 齊王 八不沙 八不沙弟 子 齊王 玉龍帖木兒 玉龍帖木兒子 月魯帖木兒

合魯溫大王

子按只吉歹大王 按只吉歹子 合丹大王 察忽刺大王 察忽刺子 濟南王 也只里察忽刺弟 吳王 朵烈 納朵烈 納子 吳王 木南子 弟 濟陽王 潑皮

鐵木哥幹赤斤國王

孫塔察兒國王 塔察兒叔父 壽王 脫里出塔察兒子 壽王 乃蠻台 乃蠻台孫 遼王 脫脫乃 蠻台兒 西甯王 撈魯蠻塔 察兒從弟 忽刺歹大王

別里古台大王

子罕禿忽大王 罕禿忽孫 塔出大王 罕禿忽從子 廣甯王 爪都爪 都子 乃顏大王 罕都忽弟 口溫不花大王 口溫不花孫 定王 辭徹 干

卷三十一 列傳第六

博爾朮

從弟 幹哥烈 特木台 孫玉昔帖木兒

者勒蔑

忽必來

赤老溫

裔孫 月魯不花

博爾忽

曾孫 月赤察兒 月察赤兒子 瓜頭 瓜頭子 完者帖木兒 博爾忽從孫 塔察兒

朮赤台

子怯台 怯台子 端眞 拔都兒 端眞子 合苔 合苔子 脫歡 脫歡子 慶童

畏答兒

子忙哥忙哥從孫博羅歡博羅歡子伯都

卷三十二 列傳第七

木華黎

子字魯寧魯子塔思塔思弟速渾察速渾察弟霸突魯速渾察子乃燕撒蠻撒蠻子脫脫 速渾察從孫朵羅台朵羅台弟乃蠻台 木華黎弟抹哥帶孫帶孫孫塔塔兒台塔塔兒台子哲別 蒙古不花 肖乃台 按札兒 闊闊不花

卷三十三 列傳第八

鎮海

札八兒

耶律阿海耶律禿花

阿海子綿思哥捏兒哥綿思哥子買哥 禿花子朱哥朱哥弟買住買住弟禿滿答兒朱哥兄子忙古帶

阿朮魯

孫懷都 雪里堅 哈散納 紹古兒 楊傑只哥

卷三十四 列傳第九

哲別

曷思麥里

速不台

子兀良合台

郭寶玉

子德海德海子侃 三哥

札刺兒帶

子塔出 撒禮塔

忒木台

子與魯赤 達海紺卜

卷三十五 列傳第十

史天倪

子楫權一弟天安天安子樞 叔父進道進道弟子天祥 王玉王子忱 耶順順弟琮

董俊

子文直 王善善子慶端

石天應

弟子佐中佐中子安琬

卷三十六 列傳第十一

吾也而

移刺涅兒

子買奴買奴子元臣

石抹也先

子查刺

藥直膺魯華

子撒吉思卜華明安答兒

王珣

子榮祖

何實

李守賢

子毅

卷三十七 列傳第十二

忽都忽

野里朮

察罕

子木花里 從孫亦力撒合亦力撒合弟亦智禮威亦智禮威子韓

嘉訥

按竺邇

子徹里徹里子步魯合答徹里弟國寶弟明安

劉敏

子世亨 布智兒 牙老瓦赤牙老瓦赤子阿里伯

卷三十八 列傳第十三

石抹明安

子威得不

劉伯林

子黑馬黑馬子元振元禮 常哥常哥子龍古帶

粘合重山

子南合

史天澤

子格 張興祖與祖子荅刺赤 李進

卷三十九 列傳第十四

太祖四王

朮赤太子

子拔都大王 拔都弟忙哥帖木兒大王脫脫大王脫脫子肅王寬徹 脫脫弟伯忽大王伯忽弟月即別大王

察合台太子

子也速蒙哥大王合刺旭烈大王合刺旭烈子阿魯忽大王 裔孫篤 來帖木兒大王 阿魯忽弟威遠王阿只吉阿只吉子威遠王忽都帖 木兒忽都帖木兒子越王秃刺秃刺子豫王阿納忒納失里西安王荅里麻

拖雷太子

子旭烈兀大王旭烈兀子阿八哈大王阿八哈孫靖遠王合贊 裔孫不 賽因 旭烈兀弟阿里不哥大王阿里不哥子威定王玉木忽兒玉木忽 兒弟子那王孛顏帖木兒孛顏帖木兒羅定王藥木忽兒 阿里不哥弟撥綽大王撥綽孫楚 王牙忽都牙忽都子楚王朵列帖木兒 撥綽弟末哥大王末哥子永甯王昌童

闊列堅太子

子河間王察忽察忽子河間王忽魯歹忽魯歹子也不干也不干弟子 安定王脫歡

卷四十一 列傳第十五

張柔

子宏略 賈輔輔子文備

洪福源

子茶邱雙叔 茶邱子重喜

汪世顯

子德臣德臣子惟正 德臣弟良臣

楊大淵

兄子文安

卷四十二 列傳第十六

王義

張榮

劉斌斌子思敬

張子良

子懋

王珍

子文幹

杜豐

子思敬

田雄

石抹孛迭兒

卷四十三 列傳第十七

三宗諸王

闊端太子

子只必帖木兒王 弟子荆王也速也不干 靖安王闊不花

曲出太子

子失列門太子失列門孫靖遠王哈歹襄甯王阿魯灰

哈刺察兒王

子脫脫大王

哈失大王

子海都大王海都子汝甯 王察八兒察八兒孫汝甯

王忽刺台

合丹大王

滅里大王

子脫忽大王脫忽孫陽翟王禿滿子陽翟王太平裔孫陽翟王阿魯輝帖木兒

裔孫陽翟王阿魯輝

禾忽大王

子南平王禿魯

阿速歹大王

玉龍苔失大王

子撒里蠻王衛王完澤完澤子邲王徹徹禿

裔孫衛王寬徹哥

河平王昔里吉

子兀魯忍不花王并王晃火帖木兒晃火帖木兒子嘉王火兒忽撫甯王徹里帖木兒

卷四十三 列傳第十八

耶律楚材

子鑄鑄子希亮

劉秉忠

卷四十四 列傳第十九

王楫

郝經

卷四十五 列傳第二十

楊惟中

趙璧

張文謙

宋子貞

卷四十六 列傳第二十一

姚樞

許衡

竇默

卷四十七 列傳第二十二

布魯海牙

孫惠山海牙 弟子希賢

陳祐

賽典赤瞻思丁

子納速納丁納速納丁子伯顏伯顏弟伯顏察兒 納速納丁弟忽辛

張立道

劉好禮

烏古孫澤

卷四十八 列傳第二十三

岳璘帖木兒

從弟撒吉思撒吉思孫孫答思麻 塔塔統阿 哈刺亦哈赤北魯裔孫阿鄰帖木兒沙刺班世傑班 楊瑀 孟速思

愛僻

月合乃

孫馬祖常

馬哥波羅

闊闊

禿忽魯

也速解兒

塔思赤

察罕

虎都鐵木魯
脫烈海牙

奕赫抵雅爾丁

卷四十九 列傳第二十四

廉希憲

子恂

商挺

子琬

陳儼

趙居信

趙炳

趙良弼

馬亨

卷五十 列傳第二十五

速哥

子忽蘭

月里麻思

子忽都哈兒

石天麟

鐵連

昔班

張庭珍

梁曾

陳孚 馮子振

卷五十一 列傳第二十六

劉整

管萬壽

呂文煥

兄子師夔

張晏然

程鵬飛

高達

朱禛孫

范文虎

蒲壽庚

王積翁

潛說友

夏貴

卷五十二 列傳第二十七

伯顏

孫相嘉失禮

阿朮

子不憐吉歹

囊家台

阿里海牙

卷五十三 列傳第二十八

紐璘

子也速答兒

也速帶兒

探馬赤

張萬家奴

愛魯

脫力世官

也罕的斤

怯烈

劉國傑

完者都

管如德

卷五十四 列傳第二十九

趙阿哥潘

子重喜

李忽蘭吉

張庭瑞

焦德裕

鄭鼎

子制宜 制宜子阿兒思蘭

速哥

劉恩

郭昂

卷五十五 列傳第三十

高智耀 子睿

李昶

楊果

王鶚

王磐

徐世隆

孟攀鱗

留夢炎 張鎮孫

葉李

卷五十六 列傳第三十一

班都察

子土土哈 土土哈子 牀兀兒 抄思 阿塔赤 也烈也烈子 玉哇失

李惟中

子恆 李楨 王紱

趙與芮

趙與票

趙孟頫

王蒙

卷五十七 列傳第三十二

塔出

董文炳

子士選

張宏範

李庭

伯帖木兒

忙兀合

子亦列赤

昂吉兒

卷五十八 列傳第三十三

楊奐

高鳴

張孔孫

閻復

孟琪 徐炎 尤玘

李謙

夾谷之奇 宋術 王倚

王暉

張九思 高鵬

王思廉

焦養直

王構

子士熙 士點 李之紹 王旭

暢師文

卷五十九 列傳第三十四

雷膺

胡祇適

魏初

陳思濟

王利用

姚天福 高源

申屠致遠

尙文

卷六十 列傳第三十五

張雄飛

相威

崔斌

崔彧

劉宣 秦長卿長卿從子山甫

楊居寬

何榮祖

程思廉

馬紹 唐仁祖

卷六十一 列傳第三十六

張德輝

李德輝 呂瑩

董文用

董文忠

卷六十二 列傳第三十七

楊恭懿

王恂

郭守敬

齊履謙

卷六十三 列傳第三十八

線真 子完澤

安童 子兀都帶

和禮霍孫

徹里

不忽木 子回回巒巒

阿魯渾撒里 子岳柱

卷六十四 列傳第三十九

阿刺罕 子也速迭兒

阿塔海

張禧 子宏綱

唆都 子百家奴

來阿八赤 樊楫 張玉

史弼

高興

亦黑迷失

羅璧 張瑄 朱清

卷六十五 列傳第四十

許國楨 子展

劉哈刺八都魯

鐵哥

秃堅不花

王伯勝

卷六十六 列傳第四十一

世祖九王

明孝太子

子晉王甘麻刺甘麻刺子梁王松山松山子梁王王禪 松山弟湘甯王送里哥兒不花送里哥兒不花子湘甯王八刺失里 甘麻刺弟荅刺麻

秦王忙哥刺

子安西王阿難荅阿難荅子月魯帖木兒 阿難荅弟按檀不花

北平王那木罕

雲南王忽哥赤

子營王也先帖木兒 相吾荅兒王

雲南諸王塔失不花秃堅不花 梁王把匝刺瓦爾密

愛身赤大王

西平王奧魯赤

子鎮西武靖王鐵木兒不花鐵木兒

不花子雲南王老的罕老的罕子豫王阿忒思納失里 老的罕弟鎮西武靖王搠思班 搠思班子涼王党兀班 鐵木兒不花弟西平王入的麻的加

甯王闊闊出

子甯王辯徹秃辯徹秃弟甯王阿都赤

鎮南王脫歡 子鎮南王老章老章子鎮南王脫不花脫不花子鎮南王孛羅不花孛羅不花子大聖奴 脫不花弟威順王寬徹不花寬徹不花子義王和尚 寬徹不花弟淮王帖木兒不花 老章弟文濟王蠻子

忽都魯帖木兒王

卷六十七 列傳第四十二

合刺合孫

阿忽台

阿沙不花

康里脫脫

李孟

卷六十八 列傳第四十三

陳天祥

何璋

程鉅夫

張珪 子景武

卷六十九 列傳第四十四

李秉彝

賈居貞

張昉

袁裕

燕公楠

千奴

吳元珪

朵兒赤

王都中

張昇

韓鏞

卷七十 列傳第四十五

趙天麟

鄭介夫

黃如徵

卷七十一 列傳第四十六

塔刺海

塔思不花

乞台普濟

劉正

郝彬

禿忽魯 弟子阿榮

伯荅沙

卷七十二 列傳第四十七

郝天挺 孫忠恕

劉敏中

徐毅

王壽

王約

王結

張養灝

敬儼

曹元用

郭貫 楊桓

王毅

高昉 曹鑑

卷七十三 列傳第四十八

旭邁傑

倒刺沙

荅失帖木兒 乃馬歹 乞赤 紐澤 蒙古塔失 雅失帖木兒 撒兒封温 阿刺 帖木兒 不花 欽察台

兀伯都刺 宋宋 吳秉道 鐵木哥 曲烈 別鐵木兒 脫李臺 馬合謀 撒忒迷 失

月魯帖木兒 鐵木哥 秃滿迭兒

馬札兒台 也兒吉尼 囊家台 楊靜

卷七十四 列傳第四十九

趙世延 別不花 速速 塔失海牙 王不憐吉台 寒食

張思明 阿禮海牙 韓若愚 也先捏兒 脫 脫木兒

李朮魯狝 虞集

歐陽元 任速哥

卷七十五 列傳第五十

李元禮 謝讓

脫歡 趙師魯

索咬兒哈迷失 觀音保 成珪 李亨先 曹伯啟

宋本 弟娶 謝端 秦起宗

白當 王克敬

卷七十六 列傳第五十一

賀勝 子太平 太平子也 先忽都 楊朵兒只

蕭拜住 拜住

脫脫 列傳第五十四

卷七十七 列傳第五十二

鐵木兒塔識 別兒怯不花

阿魯圖 紐的該

朵兒只 汪家奴 定住

伯撒里

卷七十八 列傳第五十三

許有壬 微里帖木兒 八哈石

亦憐眞班 呂思誠

朵兒直班 烏古孫良楨

賈魯 成遵

卷七十九 列傳第五十四

王思誠 陳思謙

崔敬 歸暘

張楨 陳祖仁 李國鳳

卷八十 列傳第五十五

張起巖 瞻思

李好文 劉聞 逢魯曾 蘇天爵

王守誠

貢師泰 程文

李稷

李士瞻

卷八十一 列傳第五十六

老章 太不花 劉哈刺不花

荅失八都魯 納麟

達失帖睦爾 卜顏帖木兒

慶童 也速

卷八十二 列傳第五十七

李黼 黃德隆 泰不華

星吉 福壽 百家奴 賀方 達尼達思 陳

余闕 韓建 李宗可 紀守仁 陳彬 金承宗 帖木補化 段桂芳 火失不花 新

李 盧廷玉 葛延齡 邱登 許元炎 兀都蠻 黃寅孫 黃歹綸歹 楊恆

董搏霄

弟昂霄

道童

章伯顏

石抹宜孫

邁里古思

董旭

禿堅

卷八十三 列傳第五十八

察罕帖木兒

子擴廓帖木兒

李思齊

張良弼

闊保

貂高

陳友定

子海

羅良

尹克仁

朵耳麻

卷八十四 列傳第五十九

成宗以下諸王

皇太子德壽

順陽王兀都思不花

晉王八的麻亦兒監卜

小辭太子

允丹藏卜太子

皇太子阿刺忒荅刺

燕帖古思太子

太平訥太子

真金太子

皇太子愛猷識里達臘

卷八十五 列傳第六十

世戚

特辭禪

子河西王按陳

按陳子納陳

納陳子濟甯郡王帖木兒

帖木兒弟魯王

孛禿

裔孫忽憐忽憐子昌王阿失

阿刺兀思剔吉忽里

兄子北平

子北平王孛要合孛要合孫高唐王闊里吉思闊里吉思弟高唐王兀忽難闊里吉思子

趙王兀安兀安裔孫趙王馬札罕

忽都合別乞

裔孫延安王也不干

卷八十六 列傳第六十一

段興智

阿察

裔孫阿畫 宋阿重

楊邦憲

子漢英

田景賢

卷八十七 列傳第六十二

畏吾兒

哈刺魯

高麗

土蕃

卷八十八 列傳第六十三

儒林

趙復 王粹

金履祥

許謙 梁益 劉瑾 董正

劉玉汝 朱公遷 朱震亨 范祖幹 葉儀 何壽朋 汪與

劉因

視彌堅 滕安上 烏沖 董朴 安熙 史伯璿 詹道傳 景星 蔡文淵

蕭艸

韓擇 侯均 同恕 第五居仁

吳澄

陳櫟 董鼎 陳師凱 王充耘 王天與 黃鎮成 澄孫當

鮑恂 藍光 黎仲基

耶律有尚

姚燉 孫安 韓思永 蘇郁 王遵禮 趙矩

劉季偉 劉安中 白棟 高凝

吳師道

宇文公諒 孟夢恂

周仁榮

楊珏 陳天瑞 車若水 黃超然

胡一桂

胡炳文 董真卿 保人 趙采 王申子 熊良輔 張理

尙野

龍仁夫 蕭漢中 解尙尙弟蒙 錢義方 陳應澗 俞炎 胡震 李簡

俞皋

趙良鈞 陳深 史蒙卿 程端 禮弟端學 趙汭 汪克寬 倪

黃澤

敖繼公

倪淵

士毅

邱葵

熊朋來 毛襄龍 葉宋英

陳澔

韓性

熊禾

張頤

孔思晦

曾巽申

卷八十九 列傳第六十四

文苑

劉祁

弟郁 麻革 張澄 楊宏道

戴表元

仇遠

白珽 李衍 高克恭

胡長孺

鄭滌孫弟陶孫 張伯純 姚登孫

方回

蒲壽晟 趙文

牟應龍

馬端臨

何失 宋无 李材

鄧文原

鮮于樞

何失 宋无 李材

姚燧

盧肇 劉致

元明善

虞槃

袁桷

李洞

黃潛

柳貫 吳萊

楊載

范梈 丁復 趙執謙 傅若金 楊剛中

揭傒斯

子汝 何中

劉詵

迺賢

辛文房

陳旅

王沂

柯九思

夏文彥

李孝光

鄭元祐

周砥 張憲

張翥

劉沙刺班 成廷珪

周伯琦

黎崱

卷九十 列傳第六十五

循吏

塔本

子阿里乞失 阿里乞失子阿台 阿台子迭里威失

段直

張耕 蕭孫賡

覃澄

劉肅

奧屯希愷

姜或

張礎

許楫

謝仲温

耶律伯堅

田滋

臧夢解

陸屋

張毅

卜天璋

劉德温

諳都刺

合刺普華

楊景行

干文傳

雷機

林興祖

周自強

白景亮

蘇濟

王良

盧琦

鄒伯顏

許義夫

陳麟

卷九十一 列傳第六十六

隱逸

上下

李俊民

張特立

曹之謙

杜瑛

李治

方逢辰

汪夢斗

謝翱

趙孟堅

鄭思肖

王炎午

胡三省

眞山民

李直方

龔開

劉辰翁

吾邱衍

呂徽之

貫雲石

褚師秀

武恪

陳苑

薩都刺

杜本

孫轍

楊維禎

顧瑛

倪瓚

王冕

戴良

王逢

李祁

舒頌

丁鶴年

李伯溫

忠節

攸興哥

卷九十二

列傳第六十七

元書

卷首目錄

王禮

葉杞

楊允孚

周霆震

郭珏

梁寅

魯貞

許汝霖

吳皋

徐九齡

許汝霖

徐九齡

徐志純

徐九齡

胡天游

徐九齡

俞遠

徐九齡

楊恒

徐九齡

謝應芳

徐九齡

金涓

徐九齡

王士毅

徐九齡

岑安卿

徐九齡

朱希晦

徐九齡

任志

鞏彥暉

趙匣刺 董士元

伯八兒 子八刺八刺弟不蘭奚

合刺普華

孫傑哲篤哲篤弟傑列麓 闕文興

劉天孚

蕭景茂

張桓

李羅帖木兒 兄子馬合失力 卜理 身敦上都

喜同

李朮魯遠

丑間 俞述祖 馮三

周鏜 謝一魯

買住

張鳳儀子萬里 鄧可賢

趙觀光 潘伯修

王銓

周誠德

潮海 子明安圖 黃紹胡斗元 黃雲

魏中立

湯自恩 汪伯正 胡振祖 于大本 楊樸 江日新 程擇 桂完澤

樊執敬

聶炳 明安達爾 野峻台

納速刺丁

子寶童 海留丁 西山驢

趙璉

弟琬

李齊

孫撫 盛昭

王伯顏

子楨楨弟相 陳陽盈

劉濬

子健 陳君用

彭庭堅

石普

褚不華

子仲哥

汪澤民

朵兒直班 王翕

劉耕孫

弟壽孫子碩 壽孫弟與孫 脫脫

鄭玉

弟璉 李廉子敬 朱倬 雷杭

林夢正

黃翊

羅明遠 羅次炳

蕭生

彭繼凱

袁明東

伯顏不花的斤

大聖奴 海魯丁 蔡誠 蔣廣 陳受

全普庵撒里

哈海赤

朵里不花

子達蘭不花哈乞吳普顏都 刺不花 歹不花

王士元

十琛 劉以忠 潘炎

楊椿

楊乘 周貞 劉良 劉溶

楊完者

弟伯顏

伯顏師聖

喬彝 顏瑜 趙洙 曹彥可 張岳起 王佐 陳元善 胡存

道 吳德新

王英

釋家訥 張名德 脫歡 張輔 張祖信

郭嘉

普花帖木兒 曾貫

劉鶚 子連

趙資 完者都 朗革歹

馮文舉 變理翰

向景仁 弟庭芳

普顏不花 齊郁 于德文 胡濬 張俊 申榮 張士謙 靳義 吳訥

柏帖穆兒

迭里迷實 呂福 穆魯丁 海魯丁 獲獨步丁

鄧祖勝 趙元隆

也兒吉尼 陳瑜 劉永錫 曾尚賓

朴賽因不花 張庸 段禎

丁好禮 郭庸

閔本 拜住

趙宏毅 子恭 徐孫頭

王遜志

黃昇

伯顏子中

王翰

蔡子英 陳高 魯淵

卷九十三 列傳第六十八

孝義

蕭道壽

匡國政

尹莘 孫希賢 卜勝榮

劉通 黃鑑 丁祥一 丁越 王思聰

張旺舅

葛守德

梅應發 朱良吉 胡伴侶 陳福 管如林 朱天祥 李家奴

王薦 湯霖 龐遵 陸思孝 黃道賢

丁文忠

李忠 吳國寶

李茂 余丙

宗杞 也速答立

王庸 胡士宏 楊暉 胡光遠 孫瑾 吳希曾 張恭 尹夢龍 畢

許敬觀

過宗一 潘應定

邵敬祖 李彥忠 譚景星 郭成

孔全 張子夔 陳乞兒 趙國安 張琛 李廷瑞 耶律伯顏 怯烈台

何從義

王留孫

靳昺

王克己

趙天爵

姜兼

趙榮

高必達

劉琦

曾德

羊仁

黃覺經 章卿 俞全 李鵬飛

祖灝然

陳斗龍

胡景濬

顏應祐 周古象

黃贊

趙應祥 史彥斌 廖人俊 邱敬

田喜

繆倫

郭狗狗

樊淵

賴祿孫

王閏

劉源 祝公榮

郭道卿

弟佐卿 子廷煒

朱元

張紹祖

李明德 石永壽 張緝

劉思敬

呂祐 周樂

孫抑

王初應

石明三 施合德

徐鈺

夏承慶

葉雋

陳韶孫

孔洙

長壽

那海 秋秋 高中 武進

楊一懷

張本 張慶 元善

郭全

劉德 馬押忽 劉居敬

吳好直

柴郁 陳舜咨

劉德泉

朱顯 吳思達 朱汝諧

劉廷讓

扈鐸

杜友開

唐轅

弟轍

袁清吉

陳謙

鄭德珪

子文嗣

趙毓

張閏

芮世通 尚存義 丁煦

魏敬益

訾汝道

孫秀實

賈進 李子敬

黃國華

瞿嗣興

顧德玉

王一山

沈右

顧中庸

葉公政
劉信甫

趙一德

卷九十四 列傳第六十九

列女

葛妙真 畏吾氏三女

秦氏二女

袁氏孤女

葛孝女

馬英

趙玉兒

胡泰

李智真

王安哥

李順兒

劉氏二女 鄭奴

韓氏女

陳淑真 夏婉常

周烈女

趙氏女

張氏女 湯倚

張玉娘

郭氏

崔氏

聞氏 劉氏

趙孝婦

只魯花真 梁氏 何氏 趙氏

朱淑信

周氏

林氏

白氏

焦氏

郎氏

霍門二婦

段氏 吳氏 趙氏 武氏 尤氏

劉氏

蘇氏

丁氏

馮淑安

柴氏

程鵬舉妻

張義婦 徐氏

茅氏

貴哥

郭烈婦

高麗氏

沈氏

龍氏

王氏

王氏

王氏

蕭氏 衣氏 張春兒 移刺氏 侯

李冬兒 李氏

范妙元

王氏

柳氏

王氏 袁氏

劉氏

傅氏

秦筆妻

吳妙甯

周芙

張貞

吳良正

劉翠哥

宋妻

姚氏

徐君寶妻

官勝娘 王氏女 胡烈婦

胡妙端

賀氏

黃元琇 謝蠲 李氏

朱錦哥

蔡三玉

王氏 杜氏

陳氏 高氏

張氏

禹淑靜

童氏

毛氏

蔣德新

李氏

丁月娥

呂孀婦 劉氏 王氏

齊氏

也先忽都

二女 蕭氏 呂氏

玉蓮

蕭氏

安正同

李氏

吳氏

趙氏

李哥

潘妙圓

俞氏 蔡氏

曹氏

羅妙安

李氏 宋氏 申氏 安氏

徐氏

李賽兒

李家奴

陶宗瑗

劉氏

王淑宗婉

孫氏 姚氏 華氏 劉氏

劉氏

劉冀之

黃氏

朱氏

臨安奴 馮氏 蔡氏 湯氏

趙氏

卜顏的斤

溫氏 高氏 高氏 徐氏

張棟妻 徐程妻女

阿蓋主 段僧奴

徐倡 李翠娥 王巧兒 汪憐憐

脫脫懷氏
李金兒

卷九十五 列傳第七十

藝術

田忠良

張康 陸文圭

趙友欽 張居中 朱世傑 陳時敏

項昕 葛乾孫 滑壽 王履

周漢卿

邱處機 祁志誠

褚志通

李居壽

靳德進

傅立 齊琦

李杲

呂復 倪維德

范思賢

張宗演 子與材 張留孫 吳全節

張志清

膽巴

楊連真珈

必蘭納失里

大昕

珈璘真

阿尼哥 劉元

阿老瓦丁 亦思馬丁

卷九十六 列傳第七十一

權倖

忙哥撒兒

王文統

阿合馬 張惠 耿仁 郝楨

盧世榮

桑哥 要束木 納速刺丁 滅里 忻都 王巨濟

脫虎脫 教化

三寶奴 樂實 王巖 忙哥鐵木兒

鐵木迭兒 脫忒哈 失列門 黑驢

伯顏

哈麻 弟雪雪 秃魯帖木兒

搠思監 朴不花 李邦甯

卷九十七 列傳第七十二

亂臣

鐵失

赤 阿薩 章台 禿滿

魯不花 也里牙 明里董阿

也先鐵木兒

答失兒 赤斤鐵木兒 完者 鎖南 脫火

燕鐵木兒

弟撒敦撒敦弟答里 燕鐵木兒子唐其勢塔刺海 月

孛羅帖木兒

禿堅帖木兒 老的沙 黎安道 方脫脫

卷九十八 列傳第七十三

西域

可弗叉

尋思干

你沙不耳

伊思八刺約

木刺夷

乞石迷

八哈塔

天房

密昔兒

富浪

石羅子

乞里彎

忽里模子

欣都思

怯失迷兒

占八

馬八兒

俱藍

扮卜

僧伽刺

欽察

斡羅思

康里

阿速

馬札兒

孛烈兒

乃捏迷思 答里

卷九十九 列傳第七十四

東夷

日本

瑠求

三嶼

骨鬼

斡郎

卷一百 列傳第七十五

南蕃

安南

真臘 龍牙里

暹 麻里子兒

緬 金齒 車里 八百媳婦

不憐八 八昔 刺刺

瓜哇 葛郎

南無力

須文那

卷一百一十八 列傳第七十六

韓林兒 郭子興

占城

羅斛

僧急力 丁呵兒 急蘭亦斛 毯陽

馬蘭丹

速龍 速古台 探奔 奚里

蘇木都刺

阿魯

那旺

徐壽輝 陳友諒 明玉珍

張士誠

方國珍

卷百二 列傳第七十七

自序 上下

起元太祖元年丙寅至順帝至正二十八年戊申共一

百六十三年

本紀十五

志十

列傳七十七 共一百二卷

百六十三甲
 本號十五
 自
 卷首

元書卷一

太祖本紀第一

邵陽曾廉撰

太祖法天啟運聖武皇帝名鐵木真姓奇渥溫氏其先本室韋也唐時突厥東北室建河出焉經西室韋大室韋蒙兀室韋而東室建河者幹難河也蒙兀者蒙古也亦曰蒙瓦亦曰蒙骨斯語重為蒙古其後稍西牧於幹難怯綠連禿兀刺三河之源然國微而其時陰山達靺自唐末以名通中國因隸於達靺故又稱為達靺焉遼之初世有孛端叉兒者其母阿蘭果火嬪托奔畔里健生子博寒葛荅黑博合覩撒里直而寡夜夢白光自天下屬地化金神趨其榻遂有娠而生孛端叉兒阿蘭果火歿二兄不分乞孛端叉兒家財孛端叉兒獨之八里屯幹難居焉已而博合覩撒里直往視



之則謂曰統吉里忽魯之民麇寓此無所長若以兵臨之可服也
博合覩撒里直卽歸配壯士與孛端叉兒遂脅而屬焉孛端叉兒
立部八里屯斡難而歿是爲元始祖子曰八林昔黑刺禿合必蓄
八林昔黑刺禿合必蓄生哱撚篤敦哱撚篤敦妻莫孛倫生旣孛
都爾罕及諸子凡七人哱撚篤敦歿莫孛倫以隙并其子六人皆
爲押刺伊而所殺旣孛都兒罕子海都賴乳母匿積木中以免是
時哱撚篤敦獨有少子曰納眞贅於八納忽聞之卽計殺押刺伊
而人以雪讎而躬育海都海都長納眞率八納忽怯谷諸民共立
爲君遂攻并押刺伊而列帳八刺合黑河上海都歿立其子拜姓
忽兒拜姓忽兒生敦必乃敦必乃生葛不律葛不律與金有隙因
黨其亡人金來伐敗之乃始稱汗而著其國號曰蒙古葛不律汗
歿子阿斤八刺哈八里丹等七人不立而立其從弟咸補海爲汗

咸補海爲秦赤烏氏自有傳咸補海立十數歲爲塔塔兒所誘殺
國人復立葛不律子忽魯刺爲汗忽魯刺汗屢舉兵爲咸補海復
仇其時八里丹子也速該以雄烈聞後稱烈祖神元皇帝者也烈
祖生太祖太祖之生也烈祖方以忽魯刺命與塔塔兒決戰禽其
酋鐵木眞故名太祖曰鐵木眞以昭功克烈王汗者時爲其叔父
菊兒逐失國聞烈祖名請助焉烈祖以所部兵納王汗於克烈王
汗德烈祖乃同盟而秦赤烏合安荅太子咸補海之子也亦與太
祖善已而有隙烈祖旋又見害於塔塔兒而忽魯刺汗亦歿太祖
方九歲秦赤烏塔兒忽台乞鄰勒禿等兄弟遂擯之不齒於族又
復誘收烈祖部眾太祖用是大困居數歲太祖稍長有英稱秦赤
烏益忌之乃圍太祖於帖兒古捏山囚以歸將殺之太祖乘秦赤
烏斡難河之宴走匿於河鎖兒罕失刺知之臨水而告之慎太祖

遂以夜入鎖兒罕失刺家藏氈車中明日秦赤烏大索以天暑氈車難容人不疑也鎖兒罕失刺乃贈之弓矢及馬以還太祖遂立帳桑枯兒河稍自振尋娶於宏吉刺太祖又西見克烈王汗王汗以其孤也憫之許爲盡力當是時朔漠部落朵魯班札荅刺秦赤烏主兒乞哈荅斤散只兀照烈札刺兒兀魯忙兀把鄰皆太祖同姓也及克烈乃蠻蔑里乞朵郎吉塔塔兒宏吉刺亦乞列思火魯刺思朱力斤董哀火力斤荅力台汪古幹亦刺皆服役於金而攻伐自如諸部推秦赤烏札荅刺克烈乃蠻爲強札荅刺酋曰札木合太祖幼時與結爲安荅者也先是蔑里乞與烈祖有宿憾故遂侵掠太祖札木合與王汗救焉太祖遂與札木合同營於豁兒豁納黑主不兒而止由是收集遺民又以飲食裘馬得人歡心聲譽日盛遠近歸焉逾歲札木合覺名出其下意漸疏之太祖亦以札

木合之疑也乘夜去而札刺兒主兒乞諸部多棄札木合來從者太祖族人又多厭秦赤烏於是按彈火察兒僻徹別吉遂共立太祖爲汗札木合聞之不悅也又以與太祖部人爭牧馬有怨遂搆秦赤烏合十三部眾三萬以犯太祖太祖迎擊不利退保幹難河朵郎吉兀魯忙兀降無何王汗弟也力哈可刺叛復召乃蠻以伐王汗王汗奔西遼旣而復歸糧絕太祖以其德且與烈祖舊也迎之於禿兀刺河資而禮之如父於是爲掠蔑里乞以遺王汗王汗復定其國會塔塔兒酋蔑兀眞笑里徒背金太祖以與爲世仇也因約王汗會金師夾擊之斬蔑兀眞笑里徒於是金以太祖爲察兀忽魯太祖旣得勢以約僻徹別吉及其弟大丑同擊塔塔兒違期且怨悖也因竝攻殺之於是哈荅斤散只兀朵魯班塔塔兒火魯刺思宏吉刺等及秦赤烏乃蠻蔑里乞十一部皆懼以爲太祖

與王汗合將陵轢之也因盟於禿律別兒河共立札木合爲局兒汗藉抗太祖太祖復會王汗逆擊於闕亦壇之野乃蠻有巫能禱神致風雪欲以見困及戰果大雪諸部喜兵縱而風反擊始大驚欲引還而雪已迷道遂大敗散去太祖遂獨追秦赤烏滅之是時金泰和元年也太祖勢益強明年遂帥師進攻塔塔兒平之王汗亦遂大掠蔑里乞而還旣而復會兵以攻乃蠻乃蠻別將出其後襲掠王汗太祖遣將救還之事在克烈傳泰和三年王汗以札木合之間也遂與太祖交兵宏吉刺降太祖乃使阿里海責王汗曰昔君逐於叔父菊兒窮而歸我我父爲君逐菊兒而還君故地此大有功於君一也乃蠻攻君君西奔日沒處我召還君弟札阿紺孛於金又請我兄僻徹別吉我弟大丑往擊蔑里乞以去其逼此大有功於君二也君歸不振我以厯獲諸部羊馬貲財奉焉浹旬

之間飢飽瘠肥此大有功於君三也君不告我往掠蔑里乞未嘗分遺我也及乃蠻覆君我以四將重立爾國此大有功於君四也我之征朵魯班諸部也猶海東鷲禽之於鵝雁見必獲獲則必致君此大有功於君五也君不報我則已今乃易恩爲讎王汗聞之慙而其子亦刺合欲戰太祖軍洶懼而潰夜走班朱尼河從者十九人太祖與飲渾河誓共艱難焉尋移軍斡難河源以甘言紿王汗而潛師夜趨折運都山襲破之王汗父子皆走死太祖大獵帖麥該川而還汪古酋阿刺忽思降泰和四年太祖以阿刺忽思故知乃蠻謀來伐乃先發擊之進兵駐建忒該山乃蠻太陽汗營於納忽山蔑里酋脫脫斡亦刺酋忽都花別吉暨朵魯班哈荅斤散只兀兵皆會時札木合在乃蠻謂左右曰乃蠻初謂蒙古若殺麕羔羊食其肉竝皮蹄無餘也今非曩時矣遂遁去是日大戰至晡

禽斬太陽汗朵魯班哈荅斤散只兀降於是遂擊蔑里乞脫脫走乃蠻依卜魯欲汗泰和五年伐夏至自夏獲札木合太祖欲赦之札木合自殺

元年太祖大會諸族羣臣於斡難河源建九斿白旗卽皇帝位其上尊號曰成吉思汗以博爾朮爲右萬戶木華黎爲左萬戶功臣九十五人爲千戶一號令定制制度遂征乃蠻俘卜魯欲於兀魯塔山太陽子屈出律及脫脫奔也兒的石河是歲金泰和六年宋之開禧二年也

二年復征夏遣朮赤征斡亦刺禿巴思乞力吉思降之其酋野牒亦納里阿里替也兒皆各遣使來獻名鷹

三年春至自夏夏避暑龍庭冬師趨也兒的石河射殺脫脫屈出律奔於西遼是歲金章宗殂衛王允濟立

四年春畏吾兒請屬太祖西渡河伐夏遂引河灌其都隄外潰乃還夏主納女請和初金衛王受貢淨州太祖輕之歸欲請兵攻焉會嗣位頒詔至國傳言當拜受太祖問新君誰使者曰衛王太祖遽南面唾曰我謂中原皇帝天上人此等耶卽乘馬去衛王聞益怒欲俟再貢就場害太祖太祖遂絕之

五年春金築烏沙堡以逼焉太祖命左帥哲別襲殺其眾遂略地而東起怯綠連行宮

六年春駐行宮哈刺魯請屬畏吾兒亦都護巴而朮阿而忒的斤來朝二月太祖自將伐金取大水灤豐利等縣金遣西北路招討使粘合合打來請和不許金平章政事千家奴參知政事胡沙復繕烏沙堡秋七月攻烏沙堡及烏月營拔之八月金汾陽公郭寶玉降遂破白登金西京留守忽沙虎棄城遁遂竝克桓撫州九月

金招討使紇石烈九斤陳兵三十萬於野狐嶺太祖進兵獲兒觜金將石抹明安降遂擊金師大敗之追躡胡沙之師至會河堡又大敗之木華黎進薄宣德遂拔德興府哲別入居庸關耀兵中都而還別軍南徇至於清滄東徇至於平灤朮赤察合台窩闊台徇雲內東勝武朔等皆下之南至於忻代冬太祖駐金北境初頒新令出軍不得妄殺刑獄惟重罪死餘量笞決軍戶蒙古色目人丁起一軍漢人田四頃人三丁簽一軍站戶與軍戶同民匠限地一頃僧道無益於國有損於民者悉禁之復遣哲別帥師自臨潢渡遼以攻東京不下引去還襲克之是歲秋屈出律襲執西遼主直魯古而奪其國分兵擾畏吾兒哈刺魯其葱嶺外遂爲回回據焉脫脫子霍都以蔑里乞餘眾亦自立於太和嶺東夏主安全卒族子遵頊立

七年春按陳師至遼耶律留哥自稱都元帥於隆安與按陳盟而請屬焉師圍金威甯千戶劉伯林以其城降秋圍西京金元帥左都監奧屯襄救之太祖誘至密谷口殪其眾太祖中流矢罷攻西京將休兵於北石抹明安進曰金有天下一十九路我得者未盡西京一路也若緩之待彼成謀併力而來則難敵矣且山前民庶久不知兵今以重兵臨之傳檄可定也太祖然其計乃留劉伯林屯天城復攻西京拔其城以伯林爲西京留守副元帥是歲安南王李龍翰卒子吳昂立

八年春耶律留哥自立爲遼王先是太祖之北也先得諸城皆未置守秋七月攻宣德府復攻德興府拖雷赤駒先登拔其城進至懷來執金副都統王檝禮釋之行省完顏綱元帥朮虎高琪復拒戰於鎮州而敗金嚴備居庸關軍至不得前太祖患之用札八兒

計間道夜馳黎明已至南口遂襲取居庸哲別克紫荆關耶律阿海進曰好生聖人之大德也今始開創願止殺掠太祖嘉焉進拔易及涿八月金忽沙虎弑其主衛紹王而立豐王珣冬師趣中都留合怯台哈台屯北郊而分兵三道以降人四十六都統分隸焉朮赤察合台窩闊台爲右軍循太行而南取保遂安肅及河北西路至於懷孟飲馬於河還踰太行大掠河東南北二路間哈撒兒斡嗔及朮赤台薄利爲左軍遵海而東徇薊州平灤遼以西皆下太祖自將中軍出中都南拖雷從破雄霸安取河北東路山東東路及博濟秦安師還三道皆會遂屯大口以逼中都是役也金諸路兵皆防山後事急簽鄉民城守太祖令驅其家屬攻之父兄子弟呼相應故所至輒克凡得金九十餘城大河以北惟中都通順真定清沃大名東平德邳海十一城不下

九年春太祖久駐燕郊乃遣使告金以將還當犒師金主遽遣平章政事完顏承暉如師奉衛紹王女岐國公主及金帛童男女五百馬三千以請和師還夏五月金主遷汴以其太子留守中都太祖聞之怒曰旣和而遷是疑我也將復南侵會金主至良鄉護衛弘軍作亂北還乞降遂詔石抹明安復攻中都圍之是月避暑魚兒灤秋金召太子至汴太祖以屈出律之擾西征克阿力麻里而西破谷則斡耳朵復分兵擊其黨與戰於別失八里又戰於古輪臺及畏吾兒皆敗之於是屈出律西奔哲別追斬之傳其首乃蠻悉平師還木華黎征北京盧琮金朴以高州降分兵下懿州耶律留哥大敗金宣撫使蒲鮮萬奴於歸仁遂都咸平萬奴走入東京是歲以耶律阿海爲太師行中書省事耶律禿花爲太傅濮國公哈撒兒東取黑龍江地始立行尙書省於宣平三哥拔都領之統

金降民錦州張鯨殺其節度使自立爲臨海王

十年春正月丁丑金右副元帥蒲察七斤以通州降石抹明安遂駐軍建春宮是月耶律留哥再克東京蒲鮮萬奴遁金北京軍亂殺其宣撫使鄂屯襄二月木華黎攻北京其權元帥烏古倫寅蒼虎以城降木華黎怒其緩也將坑其眾石抹也先曰北京重鎮當撫之以從人望奈何坑之乃止以寅蒼虎留守竝以吾也而權都元帥鎮之興中府元帥石天應降錦州張鯨遣使請降詔以鯨總北京兵南征三月金御史中丞李英帥師援中都明安敗之於霸州復敗其援兵於涿州宣封寨夏四月克清及順五月庚申金中都降辛酉明安入中都是月避暑桓州涼涇遣失乞忽都忽籍中都帑藏以明安爲太傅邵國公訪求遼後耶律楚材用之秋七月三哥拔都攻潼關不下乃自嵩山閒道趨汝州遂赴汴與金花帽

軍戰不利自陝州渡水而還太祖詔金獻山東河北未下諸城去帝號爲河南王許爲罷兵不從乃復南伐是秋取金城邑八百六十有三冬耶律留哥入覲耶斯不以其眾叛蒲鮮萬奴遂入東京據遼東自稱大真天王建元天泰耶斯不南走僭號於澄州改元天成太祖仍以耶律留哥爲遼王趙守玉據興州吾也而史天祥討禽之是歲金太子守忠卒

十一年春還行宮師克金曹州金同知觀州張開取河閒及滄獻等州三月金人取恩邢夏四月張開取青州十一城是時河北山東諸城多復爲金守張鯨謀叛伏誅鯨弟致據錦州自稱瀛王遂陷平灤瑞利義懿廣甯諸地秋九月撒里知兀觶三哥拔都自夏趣關中冬十月越潼關獲金西安軍節度使尼龐古蒲魯虎十一月次澠池金右副元帥蒲察阿里不孫軍潰遁師自三門北渡至

平陽與金行省胥鼎戰不利引還是冬蒲鮮萬奴降是歲太傅石抹明安薨太祖大會諸將於和林命速不台征蔑里乞餘眾耶律留哥還遼徙居臨潢耶斯不乞奴金山青狗統古與遁入高麗迭稱帝而迭相殺既而咸舍殺統古與而自立

十二年春木華黎破錦州斬張致遣史進道等攻廣甯府降之遂拔金蓋復而還秋以木華黎爲太師都行省封國王賜九旂旗經略山南承制行事遂自燕南擊破遂蠡冬克大名府遂東定益都淄登萊濰密等州蒲鮮萬奴復叛稱東夏十二月師復伐夏圍其都夏主遵頊奔西涼是歲吐麻叛博爾忽戰死朵魯伯討平之朮赤再征乞力吉思闕地至北海焉

十三年秋八月師出紫荆關執金行元帥事張柔還其舊職木華黎自太和嶺入河東克代忻九月乙酉克太原冬十月癸丑克平陽遂分徇澤潞遼沁汾霍皆克之是歲咸舍據高麗江東城元帥哈真副元帥札刺兒帶及遼王留哥帥師征之高麗王瞰遂降以兵附焉大破咸舍之眾咸舍死留哥徙其民於臨潢

十四年春張柔克雄易保安諸州殺金經略使賈瑀復敗武仙於滿城進拔定州及中山別將攻平棘橐城無極欒城皆下擢金降將董俊知中山府事太祖怒可弗又殺使者夏六月遂親征西域出師大雪秋克訛荅刺城禽其酋哈只兒只蘭禿是秋木華黎克金尙嵐吉陞等州進攻絳冬十一月戊午克之屠其城以按札兒領前鋒統師屯平陽攝國王事速不台以是歲敗蔑里乞於蟾河霍都奔欽察欽察納之於是太祖詔速不台急進兵欽察降遂盡殄蔑里乞之眾太祖師自嶺而西復攻破別石闌城可弗又滅里鎖潭汗陳兵於忽章河不得渡太祖攻破之遂濟師而西復渡薩

寶河以攻蒲華

十五年克蒲華乃東擊尋師干夏克之滅里鎖潭汗出奔鐵門關太祖還師避暑別石關北河上秋攻河北斡脫羅兒穴其城入之金大發兵益武仙董俊判官李全以中山叛應之仙攻俊於曲陽爲俊所敗於是武仙以真定降木華黎以史天倪爲河北西路副元帥行府事仙副之以董俊爲左副都元帥駐橐城冬大雷宋濟南治中嚴實籍濟南彰德磁沼滑濬等城戶數十萬以降木華黎攻東平不下以嚴實權山東西路行省留屯守而自趨沼州分徇河北是歲定都和林耶律楚材進庚午西征元秣遼王留哥薨以其妻姚里氏權領其眾滅里子札闌丁收可弗又兵復入尋斯干十六年春太祖復南渡忽章河取蒲華札闌丁棄尋斯干欲走玉龍傑赤太祖追敗之札闌丁遂走鐵門關與滅里合失乞忽都忽

追之戰不利太祖帥察罕郭寶玉進破其兵遂入鐵門關朮赤循忽章河而西攻八兒真氈的養吉干皆下之夏太祖以太師耶律阿海守尋思干而自駐鐵門關金遣烏古孫仲端奉國書兄太祖以請和不允金東平行省蒙古綱棄城遁嚴實遂守東平分濟兗單三州以石珪爲總管宋使苟夢玉來修和遣使報焉秋可弗又復以兵五萬阻阿母河破之斬其大將佐里太祖南渡河入弗羅珊克班勒紇等城滅里札闌丁分東西遁太祖命哲別急追滅里於灰里河滅里走死於小海札闌丁走還可弗又屯大雪山太祖遣郭寶玉曷思麥里追之札闌丁走哥疾甯太祖駐大雪山分兵東取巴達哈傷哲別破木剌夷山堡虜滅里母妻以歸於軍是秋朮赤察合台窩闊台西渡河攻下玉龍傑赤冬拖雷下馬魯等城木華黎出河西夏兵附之克金葭綏保安進攻延安不下乃留兵

守之而自御鄜坊逾月克之宋京東安撫使張林降以林行益都
滄景濱棣都元帥

十七年春詔封崑崙山元極王大鹽池惠濟王拖雷西降你沙不
兒等城復還軍經木刺夷大掠之渡湖湖闌河克也里遂從太祖
攻塔里寒寨拔之夏避暑塔里寒秋太祖會師逾大雪山而南自
伐札闌丁於哥疾甯札闌丁奔入欣都思郭寶玉曷思麥里收可
弗乂而還入刺帥師攻欣都思欽察復立玉里吉汗太祖命哲別
繞小海以討欽察金張開取澤州是秋八月彗星見於氏九月太
白晝見金復遣烏古孫仲端來請和太祖初不許已而許其割關
西未下數城仍王河南木華黎分兵出秦隴而自道雲中出孟晉
霍遂攻青龍堡執金平陽公胡天作歸於平陽金移刺眾家奴張
甫取河間府宋大名忠義彭義斌取山東州縣石珪入曹州金王

庭玉破執之木華黎克河中府其治中侯小叔退保樂李山寨以
石天應爲都元帥守河中木華黎遂渡河攻同州拔之進攻京兆
不下乃將大軍攻鳳翔是歲張林及宋人戰敗走宋保甯節度使
李全入益都

十八年春正月鳳翔不下木華黎遣將徇鳳州而還金侯小叔復
取河中石天應死之尋定河中斬小叔三月太師國王木華黎薨
於聞喜是春太祖師自辛頭河而北窩闊台循河而南夏窩闊台
至不昔思丹欲攻之太祖以隆暑將及止之遂避暑八魯彎川八
刺大掠欣都思而還可弗乂回地悉平置達魯花赤監治各城乃
命搠馬兒罕征八哈塔命朵魯伯征阿魯申命速不台進征欽察
命朮赤往節制哲別速不台軍太祖復親征欣都思是歲金宣宗
殂子守緒立夏主遵頊傳國於其子德旺自稱上皇金取河中及

榮霍汾西洪洞

十九年宋大名總管彭義斌侵河北史天倪敗之於恩州太祖至東欣都思欲取道蠻夷中以達西夏角端見班師留太師耶律阿海監尋斯干總治西域是歲哲別已破斡羅思康里諸軍而北進逼欽察速不台繞寬田吉思海而南抵不租河執玉里吉遂平欽察封朮赤王欽察斡羅思康里阿速竝屬焉師還哲別卒於軍札闌丁自欣都思復歸可弗又遮其師於崢山郭德海擊斬之速不台至玉里吉河敗斡羅思各城降其大小密赤思臘封察合台王子闐宋主擴殂沂王子的立高麗盜殺使者著古歟等金人取澤潞安南國王李昊昂卒其女壻陳日昃立

二十年春正月至自西域駐行宮二月武仙復以真定叛附於金河北西路都元帥史天澤擊走仙復真定六月宋彭義斌圍東平嚴實僞與和以緩之義斌留質實家屬秋義斌挾實趨真定實奔字里海軍合擊義斌宋軍潰史天澤禽義斌於贊皇斬之嚴實復有山東十二月武仙復襲真定史天澤奔橐城是歲張榮以淄州及章邱濟陽蒲臺新市等地降以爲山東行省都元帥知濟南府事金取絳州劉德仁死之速不台大掠阿速而還

二十一年春正月太祖以夏不遣質子而納仇人亦刺合桑昆詔親征二月西踰沙磧取黑水等城史天澤自橐城復克真定武仙走西山夏避暑渾垂山師克甘肅等州秋克西涼及柵羅和羅等城東踰沙陀至黃河九渡遂克應里等縣金人取曲沃九月郡王帶孫圍李全於益都冬十一月師克靈州丙寅太祖渡師擊其援兵敗之丁丑五星聚見於西南駐鹽川州是月速不台自大磧攻

下撒里畏吾兒及荅林赤閔遣唐慶往責金歲幣以耶律留哥子
辭闕歸臨潢襲轄其軍馬是歲夏主父遵頊卒七月夏主德旺憂
悸亦卒弟覲立

二十二年春太祖渡河攻夏都旋留兵守之而自帥師渡河攻金
積石州拔之二月克臨洮府三月別軍克西甯速不台入自玉門
關克河州洮州遂與太祖師會克蘭州會州是月斡嶮攻信都拔
之夏四月太祖至隆德師克德順鎮戎等州李全降請南伐以爲
山東淮南楚州行省遣唐慶等使金閏月避暑六盤山六月金遣
完顏合周奧屯阿虎來請和夏主李覲降遂繫以歸夏亡太祖次
清水縣西江秋七月壬午不豫己丑駐撒里川哈老徒謂左右曰
金精兵在潼關南據連山北阻大河難遽破也宋金世讎若假道
於宋下兵唐鄧直擣大梁金急必徵兵潼關然千里赴援人馬疲

敝雖眾破之必矣言訖而崩壽六十有六葬起輦谷少子拖雷監
國至於明年阿朮魯自西夏帥師圍金慶陽人言其
論曰太祖崛起三河之源奄有漢代匈奴故地而兼西域城郭諸
國朔方之雄盛未有及之者也遺謀滅金竟如其策金亡而宋亦
下矣此非其略有大過人者乎又明於求才近則遼金遠則西域
仇敵之裔俘囚之虜皆收爲爪牙腹心厥功爛焉何其宏也立賢
無方太祖有之矣羽翼盛斯其負風也天子孫蒙業遂一宇宙不
亦宜乎

新甯劉能紀刊宋本
 門人曾紀芬襄校
 門人曾士琮詳校
 元書卷一

元書卷三

邵陽曾廉撰

太宗本紀第二

太宗英文皇帝名高闊台太祖第三子也母光獻翼聖皇后宏吉刺氏太祖伐金平西域常別將攻城略地功多初察合台與朮赤有違言太祖定以窩闊台為嗣故遺詔立之於是自霍博來會喪元年夏監國拖雷太子迎見於忽魯班雪不只秋八月大會諸王羣臣即皇帝位於庫鐵烏阿別里始立朝儀皇族尊屬皆拜頌大札撒禁長吏專生殺以劉黑馬粘合重山史天澤三萬戶分守中原始定算賦蒙古計馬牛羊漢民以戶西域以丁欣都思主木刺夷主來朝是歲尊察合台為皇兄自敦煌置驛抵玉門關通西域遂徧立驛傳置倉廩焉金使阿虎帶來歸太祖之賄不受復來聘

亦卻之

二年春詔自今年正月朔以前事皆勿問阿朮魯久圍慶陽與金忠孝軍提控完顏陳和尚戰於大昌原失利解圍還是春獵於斡兒寒河夏避暑塔密兒河秋七月太宗自將伐金命給平陽民牛具竝關中人民墾地河東遂渡河攻鳳翔八月史天澤破衛州十一月速不台攻潼關不克移攻藍關復與完顏陳和尚戰於倒回谷敗績乃還始置燕京宣德西京太原平陽真定東平北京平州濟南十路徵收課稅使驗實息定酒稅十取一雜稅三十取一是月李全攻揚州及宋淮東安撫副使趙范等戰敗績十二月師拔韓城及蒲城

三年春正月李全敗死於揚州夏四月克鳳翔金人棄京兆遷其民於河南金降人李昌國言於拖雷太子曰金遷汴將二十年所恃者潼關黃河耳若出寶雞以侵漢中不一月可至唐鄧大事集矣拖雷太子以聞太宗喜曰此太祖之志也於是議國王斡嗔那顏將左軍出濟南拖雷太子將右軍自鳳翔出興元下漢水太宗將中軍自碗子城南下渡河出洛陽期同以明年會汴五月避暑九十九泉其月拖雷出師寶雞遣搠不罕假道於宋宋人殺之拖雷太子怒其棄好也秋八月入大散關破鳳州分兩軍一軍徑出華陽屠洋州一軍入武休出其東南遂殘興元東會洋州軍而東太宗行幸雲中以耶律楚材爲中書令鎮海爲右丞相粘合重山爲左丞相是月命撒禮塔帥師討高麗洪福源以千五百戶迎降遂克四十餘城高麗王瞰請降撒禮塔承制設官分鎮其地乃還冬十月太宗親圍河中十一月拖雷太子入饒風關遂自金房趨均州敗金兵於武當山十二月濟漢與金平章完顏哈達參政移

元書 卷二
刺蒲阿相距於禹山三日金人退保鄧州獲其輜重是月克河中
四年春正月戊子自孟津白坡濟河會拖雷太子師壬辰拖雷太
子自唐州趨汴甲午太宗次鄭州丙申大雪丁酉又雪次新鄭時
鄧州之師十五萬援南京拖雷太子問計於速不台對曰城居人
不耐勞苦數挑以疲之乃可覆也遂以三千人尾之金人至則退
之止則襲之是日金軍屯三峯山寒餒而仆拖雷太子合河北之
師圍而蹙之金師潰聲如崩山獲移刺蒲阿戊戌太宗至三峯山
壬寅攻鈞州獲完顏哈達竝斬其將完顏陳和尚是月國王幹噴
南渡河師攻歸德不下金召潼關之師入援其守將李平卽以潼
關降師追其援兵於鐵嶺殪之三月師圍洛陽不下命速不台圍
南京金主遣其弟曹王訛可爲質太宗乃還速不台退屯河洛間
夏四月避暑官山六月高麗叛盡殺所置官吏徙民江華島秋七

月以李全子壇爲益都行省遣唐慶使金金人殺之八月金參政
完顏思烈恆山公武仙救南京皆敗走撒禮塔復征高麗攻處仁
城中矢卒九月拖雷太子薨於阿刺思的思太宗還龍庭冬十月
高麗悉眾攻西京屠其民十一月獵於納蘭赤刺温之野十二月
如太祖行宮金主謀出就外兵遂嚮河北速不台復圍南京
五年春正月金主攻衛州史天澤敗之遂奔歸德金西面元帥崔
立殺留守完顏奴申完顏習捏阿不以南京降二月行幸鐵都烈
命貴由太子及按只吉歹王將左翼軍以討蒲鮮萬奴三月壬辰
崔立以金太后王氏后徒單氏及梁王從恪荆王守純諸宗室等
出至青城速不台遣送行在四月速不台軍遂入南京詔罪止完
顏氏餘原免凡一百四十萬戶五月師克洛陽六月金主奔蔡塔
察兒帥師圍蔡詔以孔元措襲封衍聖公奉孔子祀秋七月獵於

兀必思括中州戶九月國王塔思會貴由太子軍禽萬奴遂平遼東冬十一月宋遣荆鄂都統孟珙帥師會攻蔡金徐州降十二月歸德降是冬幸阿魯兀忽可吾行宮大風霾七晝夜詔修孔子廟治渾天儀是歲鎮海罷右丞相領宏州工匠局事

六年春正月金主傳位於宗室子承麟遂自焚城拔亂兵殺承麟宋人取金主餘骨以歸金亡是春會諸王宴射於斡兒寒河夏五月大會於達蘭達葩申嚴條令禁宮禁諸男女出入相雜萬戶千戶百戶甲長越次前行及管軍養馬不如法在室在軍喧呼及婦人質孫衣違制與妬忌者初宋人會攻金約分陳蔡以西北爲蒙古東南爲宋宋人欲乘時復二京撫定中原六月宋遣知廬州全子才帥師圍汴李伯淵殺崔立以降宋宋人遂入南京秋七月宋人入洛陽太宗欲自將以伐宋國王塔思請行遂命總師南伐其

月詔忽都忽爲中州斷事官太師都元帥達海紺卜太傅總領也可那顏耶律朱哥同帥師伐宋川峽八月宋汴洛之師皆敗走冬獵於脫卜寒

七年春城和林起萬安宮詔皇子貴由諸王拔都蒙哥及速不台征西域唐古洪福源征高麗皇子闊端曲出分道伐宋冬十月諸王口溫不花攻光化克之遂會曲出塔思破棗陽徇襄鄧進攻郢不下大掠江陵而還十一月闊端攻石門金鞏昌便宜都總帥汪世顯降復還其舊職中書省臣請契勘大明秣從之十二月闊端破沔州圍青野原宋利州統制曹友聞來援闊端乃還是歲拔高麗龍岡咸從二縣鳳海洞三州山城及慈州又攻金山歸信昌朔諸州克之左丞相粘合重山薨

八年春萬安宮落成諸王各治具來宴會詔造交鈔行之三月復

脩孔子廟葺司天臺宋襄陽軍士以其城降夏四月師攻宋蘄州不克隨郢荆門守將棄城遁竝攻復州下之六月復括中州戶口始令民隸州縣定賦稅立編脩所於燕京經籍所於平陽召名儒梁陟王萬夔著直釋九經進講東宮竝率大臣子弟執經解義秋七月令陳時可閱刑民科差課稅等案赴闕照磨以眞定民戶奉皇太后湯沐諸州民戶分賜諸王貴戚有差初太宗欲裂土分親王功臣耶律楚材請由朝廷置官吏分租頌之非奉詔不得徵兵賦從之八月曲出克德安府九月闊端破宋兵於陽平關斬曹友聞冬十月皇子曲出薨於軍闊端入成都金秦鞏諸州降遂破階文會聞曲出之喪遂棄成都而還師攻江陵及宋孟珙戰敗績察罕攻眞州亦敗而還以游顯領襄陽樊城事是歲以闊闕不花按札兒孛羅肖乃台怯烈台五部將分鎮中原

九年春獵於迦堅茶寒之澤始給官府符印定驛令拔都貴由等征欽察破之蒙哥禽欽察酋八赤蠻以獻於朝夏四月築掃鄰城起迦堅茶寒殿秋令木虎乃劉中試選諸路儒士除本貫議事官冬十月獵於野馬川如龍庭遂至行宮是冬口温不花入宋淮甸光州守董堯臣以其州降舒蘄守棄城遁進攻黃州不克察罕帥師攻安豐不克進攻滁州拔之史天澤擊宋師於壽春蹙之淮水大敗之

十年春獵於迦堅茶寒築圖蘇湖城起迎駕殿秋旱蝗詔免諸路今年田租仍停其舊逋察罕圍廬州不克宋孟珙取郢州荆門軍冬詔收天下禮冊樂器竝徙知禮樂舊人赴東平以孔元措領之是歲達海紺卜克隆慶金張子良以泗州西域二十五縣軍民降十一年春復獵於迦堅茶寒闊端至自成都朝於獵所宋孟珙取

襄樊秋游顯自宋逃歸山東諸路災免其稅冬十一月蒙哥圍阿速蔑怯思城閱三月拔之十二月商人奧都刺合蠻撲買中原銀課二萬二千錠以倍爲額從之是歲國王塔思薨

十二年春以奧都刺合蠻提領諸路課稅所貴由遣使奏捷命張柔等八萬戶伐宋冬詔貴由蒙哥班師拔都專西征事尋命諸王旭烈兀昔班合丹同征西域敕州郡失盜不獲者以官物償之並詔以官物代償官民貸回回金七萬六千錠先是貸回回金歲加倍名羔羊息至是限子母相侔而止著爲令籍諸王大臣所俘男女悉放爲民是歲達海紺卜圍萬州征行大元帥按竺邇順流逐宋師敗諸夔州

十三年春獵於迦堅茶寒有疾詔赦天下囚徒三月命都總萬戶劉黑馬巡撫天下察民利病秋高麗王瞰請降以其族子縛入質冬十月師復圍安豐不克十一月太宗出田五日庚寅還至鉞鐵鐸胡蘭山奧都刺合蠻進酒懽飲極夜辛卯遲明崩於行殿壽五十有六葬起輦谷初太宗有旨以曲出子失列門嗣位太宗既崩昭慈皇后乃馬真氏召中書令耶律楚材問之楚材曰先帝有遺詔幸遵行之后不從遂稱制於和林是歲皇兄察合台薨宋將田顯以成都降都元帥土僻殺宋制置使陳隆之於漢州遂竝漢州屠之宋人囚我使臣月思麻里於長沙拔都率速不台虜翰羅思酋也烈班破禿里斯哥城復與旭烈兀昔班合丹五道進兵以擊馬札兒至禿納河拔其城而還

昭慈皇后稱制一年春正月太傅耶律朱哥帥師自京兆取道商房趨三川遂攻瀘州宋人分兵禦之不能克夏五月師破宋遂甯瀘敘等州秋七月張柔自五河口濟淮攻揚滁和等州及宋師戰

於天長東大敗之冬十月師攻通州宋守臣杜霆棄城遁遂破之屠其民

二年春正月張柔分兵屯田於襄城北以柔總諸軍鎮杞柔遂築連城結浮橋於三道河上以遏宋師二月師破資州

三年夏五月師圍宋壽春不克中書令耶律楚材薨楊惟中為中書令

四年春二月宋人取五河秋師及宋人戰於五河隘口又戰於濠州失利察罕及張柔入宋淮西拔壽春又敗宋師於泗州遂徇揚州而還是歲阿母罕與洪福源拔高麗威平虜城

論曰太宗時金人已弱然猶足阻河為固也太宗遵遺令戡鳳翔道興元以達唐鄧而汴梁墟可謂聞斯行之矣當是時操持國政耶律楚材鬱為時棟然太宗之用楚材以利也太宗言利楚材即

以其利利天下而紀綱粗立矣用相違也而相成也豈非天哉故開國之運雲龍風虎非雷同也

門人曾士

門人曾士

新甯劉能紀 刊

門人曾紀元襄校

門人曾士琮詳校

元書卷二

元書卷三

邵陽曾廉撰

定宗本紀第三

定宗簡平皇帝名貴由太宗長子也母昭慈皇后乃馬真氏太宗嘗命與按只吉歹伐金伐遼東戰皆有功又與諸王拔都伐西域至阿速攻木柵山寨以三十餘人與戰貴由及蒙哥與焉太宗崩遺詔立失烈門既而昭慈皇后臨朝四年乃會諸王百官於達蘭達葩議立之

元年秋七月即皇帝位於汪吉宿滅禿里以中書令楊惟中宣慰平陽諭金武仙餘黨於大明川降之奧都刺合蠻有罪誅死八月以耶律鑄領中書省鎮海復為右丞相是時朝政猶出於六皇后冬獵黃羊於野馬川命察罕拓江淮地萬戶史權等耀兵淮南攻

元書 卷三
虎頭寨拔之進至黃州是歲昭慈皇后崩拔都率兀良哈台征孛烈兒及乃捏迷思平之

二年春張柔攻泗州夏避暑曲律淮黑哈速秋八月命野里知吉帶率搠思蠻兵以征西域是歲詔蒙古每百戶以一人充拔都魯九月取太宗宿衛之半以也曲門荅兒領之十月括人戶

三年春西巡葉密里拔都自康里來朝謁未至三月定宗崩於橫相乙兒壽四十有三葬起董谷野里知吉帶歸自西域說欽淑皇后斡兀立海迷失立失烈門聽政從太宗遺旨也

失烈門元年

二年宋四川制置使余玠燒絕棧道圍興元文州降將王德新自階州叛走江油興元行省龍古帶拒守鄭鼎脩復棧道遂與土辭汪德臣及宋人戰卻之按竺邇遣將擣江油拔其所執將領而還

論曰定宗之世事多缺漏而前史曰帝崩之歲大旱河水盡涸野草自焚牛馬十死八九人不聊生諸王及各部又遣使於燕京迤南諸部徵求貨財弓矢鞍轡或於西域回鶻索取珠璣海東索取鷹鵠驛騎絡繹晝夜不絕民力益困然自壬寅以來法度不一內外離心而太宗之政衰矣其言壬寅蓋以昭慈皇后稱制時言之也夫定宗卽位時年四十矣而不能輯諸王侯大將紀解威褻此太宗之不謀付以匕鬯者乎然在於漢則亦孝惠之亞也惟無良臣爲之輔弼而宗藩黨羽遂成以奪皇阼災異之叢興其足信耶而失烈門則太宗遺詔所立也前史復曰定宗崩後三歲無君蒙哥之黨之不欲以爲君非蒙古之無君也竄之北陲竝逐太宗皇后而弑定宗皇后可不謂之逆哉自是而太宗子孫亦不欲以蒙哥兄弟爲君逮於海都而中原震矣

元書卷三

新甯劉能紀 刊

門人曾 謙襄校

門人曾士琮詳校

元書卷四

邵陽曾廉撰

憲宗本紀第四

憲宗桓肅皇帝名蒙哥拖雷太子之長子太祖之孫也母克烈氏
 幼育於太宗一日太宗方御帳殿置之膝下撫其首曰是可以君
 天下既長為娶妃分之部民拖雷薨乃始歸邸號為蒙哥大王嘗
 命攻欽察其酋八赤蠻逃於寬田吉思海蒙哥大王亟進兵則大
 風刮海渴八赤蠻就禽師甫還而海水至眾驚異以為天焉復與
 定宗及拔都征斡羅思阿速事在西域傳定宗崩欽淑皇后立失
 烈門聽政已二歲威令未立於是諸王拔都阿里不哥末哥唆亦
 哥秃塔察兒大將兀良合台速你帶帖木迭兒也速不花會於阿
 刺脫忽刺兀議推戴王是時欽淑皇后使者入刺亦至因詰之曰

太宗遺詔立失烈門諸王百官實與聞之今可更議耶札魯花赤忙哥撒兒進曰昔太宗皇后舍失烈門而立定宗汝何不言且立蒙哥大王亦太宗遺旨也蓋謂帳殿之言也

元年夏六月西方諸王別兒哥脫哈帖木兒東方諸王也苦移相哥脫忽按只吉歹塔察兒別里古台西方諸大將班里赤等東方諸大將也速不花等復大會於闊帖兀阿闌共勸進其月卽皇帝位於斡難河命諸王旭烈兀與忙哥撒兒帥兵覘伺失烈門動靜以諸王也速蒙哥不里火者後期不至命元帥不憐吉解帥兵備之遂令忙哥撒兒長札魯花赤孛魯合長必闍赤掌宣發朝覲貢獻及內外聞奏晃兀兒阿藍荅兒留守和林宮闕帑藏忽必烈領治漠南漢民置燕京別失八里阿母河三行尙書省兩淮四川土蕃三統軍令凡朝廷及諸王濫發牌印詔旨宣命盡收之諸王馳

驛許乘三馬遠行毋過四馬諸王不得擅招民戶諸官屬不得以朝覲爲名賦斂民財輸糧遠者許附近倉罷築和林城役千五百人而是時野里知吉帶持兩端與也孫脫等因也速蒙哥之忿通謀不利於憲宗劄車轅藏兵其中以入忙哥撒兒覺而禽之乃命誅野里知吉帶籍其家遂殺也孫脫暢吉爪難合荅曲憐阿里出剛疙疸阿散忽都魯等以靖亂黜也速蒙哥以合刺旭烈嗣王于闐是歲詔復天下儒士忽必烈開府金蓮川

二年春行幸失灰皇太后宏吉刺氏崩是月忽必烈奏置經略司於汴分兵屯田二月師攻宋隨郢安復不克三月汪德臣城沔州夏車駕還和林失烈門出居於沒脫赤也速蒙哥從之定宗皇后及失烈門母厭禳事覺其日定宗皇后崩失烈門母薨是月居太宗皇后於闊端所居之西蒙哥都從之以太宗后妃貲財分給親

王遂分置太宗子孫合丹於別失八里滅里於也兒的石河海都於海押立別兒哥於曲兒只脫脫於葉密立又禁錮和只納忽孫脫於軍營是夏以漢地分封宗屬忽必烈大王受分陝西河南地行幸曲先腦兒忽必烈入覲命率諸王鈔合兒也只烈大將兀良合台等以征大理秋八月庚申始以冕服祭天於日月山癸亥合祀昊天后土以祖考竝配始大合樂冬十月命淄川王也苦征高麗汪德臣兵薄嘉定與宋余玠戰不克乃還行幸月帖古忽闌時因獵墮馬傷臂不視朝百餘日十二月戊午大赦于闐王合刺旭烈堯徙居匠工五百戶實行宮是歲籍漢地民戶

三年春正月城利州遂屯田於利師侵萬川入西柳關至鼈坑石碑谷而還上獵於迦堅茶寒淄川王也苦以怨襲塔察兒國王營上遂大會諸王於幹難河皆厚賜之罷也苦征高麗兵以札刺兒

帶爲征東元帥節度諸將以討高麗是月命必閣赤別兒哥括幹羅思戶口三月師攻海州宋人逆戰於城下敗之夏六月命旭烈兀征西域塔塔兒帶撒里土魯花等征欣都思及怯失迷兒其月幸火魯忽要納不花秋幸軍腦兒忽必烈師出六盤山而南進自臨洮次忒刺與鈔合兒也只烈兀良合台等分三道徇土蕃諸城忽必烈留輜重於滿陀越雪山過大渡河經行山谷二千餘里至金沙江乘革囊及楫以渡摩些蠻主唆火脫因塔裏馬來迎降冬會師大理大理王段興智降忽必烈禽斬其用事者高祥於姚州遂班師留兀良合台征未服諸蠻以劉時中爲大理宣撫使仍以興智同輯其民上駐汪吉復命也苦征高麗遂會洪福源兵攻拔禾山東州春州三角山楊根天龍等城是歲旭烈兀大王征木剌夷破其兵五萬下一百二十八城也可札魯花赤忙哥撒兒卒忙

哥撒兒泄事多怨乃下詔慰其子焉

四年春獵於迦堅茶寒汪德臣襲宋制置使余晦之師於紫金山大破之遂奪其城是月忽必烈大王自大理還以京兆分地置宣撫司夏幸月兒滅怯土命火里赤助征高麗秋詔官吏入計者許自首不公惟禁其後浮費兀良合台帥兵攻大理別部善闡城克之冬獵於也滅干哈里又海忽必烈大王至自大理朝於獵所是歲會諸王於顯顯腦兒之西祭天於日月山初籍新軍詔求可以慎固封守閑於將略者張柔移鎮亳州遂城亳築甬道自亳抵汴隄百二十里復爲橋十五成以二堡以通糧道權萬戶史權屯鄧州宋均州總管孫嗣以蠟書乞降權以奇兵援嗣而來於是驍將鍾顯王梅杜柔袁師信皆相繼率所部降洪福源從札刺兒帶攻光州安城忠州元鳳珍原甲向玉果等城拔之

五年春詔徵逋欠錢穀夏幸月兒滅怯土秋張柔復築甬道自亳州南六十餘里中爲橫江堡又柵百丈口以遏宋舟是歲兀良合台盡破烏蠻白蠻鬼蠻等部魯斯阿伯降凡大理五城八府四郡及蠻部三十七皆平都元帥兼領尙書省事察罕卒

六年春大風起朔方揚沙晝晦大會諸王百官於欲兒陌哥都宴飲六十餘日各賜金帛有差仍定諸王歲賜之數始立開平府城忽必烈奏請續簽漢軍從之夏四月幸塔密兒五月幸昔刺斡耳朵六月太白晝見幸解札兒阿荅諸王移相哥駙馬也速兒請伐宋秋七月命諸王各歸藩國王塔察兒駙馬帖里該軍過東平掠民羊豕遣使問罪詔兀良合台便宜赴蜀兀良合台遂出烏蒙敗宋兵三萬奪其船三百於馬湖江遂濟江抵合州與鐵哥帶兒兵會冬幸阿塔哈帖乞兒蠻以阿母河降回分賜諸王百官是歲干

戶董文蔚城光化及昆陽棗陽旭烈兀攻乞都卜城降之
七年春幸忽闌也兒吉詔諸王伐宋董文蔚攻樊城入其郛以阿
藍荅兒爲陝西行省左丞相劉太平參知政事立鈎考局理算陝
西河南錢穀以大理地悉爲郡縣詔加兀良合台大元帥還鎮之
夏如太祖行宮祭旗鼓復會於怯綠連還幸月兒滅怯土秋幸軍
腦兒灑馬漣祭天以乞鯁爲斡羅思達魯花赤賜以馬三百羊五
千回回獻水精盆珍珠傘命稍酬其直禁毋復有所獻國王塔察
兒帥諸軍圍樊城以霖雨連月班師元帥不憐吉鯁軍自鄧州略
地遂渡漢江冬兀良合台征安南入其都安南王日烜竄海島兀
良合台大饗軍士而還上渡大漠南至玉隴棧忽必烈大王盡室
歸朝因入見相對而泣是時阿里不哥大王及諸王八里土出木
哈兒玉龍荅失昔里吉公主脫滅干皆會乃大宴各遣歸是歲旭

烈兀大王軍至兀里兒阿刺丁乞石迷其素丹皆降進至八哈塔
破其都東西二城其哈里發自縛以降下其國三百餘城遂西破
天房下一百八十五城復進擊克其西密昔兒
八年春正月駐也里本朵哈受朝賀安南國主日烜傳國於其子
光昺二月光昺使人以方物來見回回平旭烈兀大王遣使來獻
捷詔以旭烈兀鎮其地號波斯王馬上獵於也里海牙命諸王阿
里不哥守和林參知政事劉太平往括興元戶口遂伐宋車駕臨
東勝河水未釋覆土而渡命忽必烈帥師趨鄂以向杭州國王塔
察兒帥師攻荆山數道竝進又命兀良合台自交廣會於長沙是
月宋制置使蒲擇之攻成都敗遁夏駐蹕六盤山諸守令來覲以
明安荅兒爲太傅守京兆遂分三道入蜀上自將出隴州進散關
諸王末哥出洋州進米倉關亭里又出魚關進沔州秋行幸興元

冬進幸利州渡嘉陵江而西汪德臣造浮橋於白水江以濟師進
攻大獲山閬州守將楊大淵以其城降以爲侍郎都行省諸王末
哥等悉會龍州石泉運山青居大良皆降復拔雅州山東行省李
壇克宋海州漣水軍是歲大元帥兀良合台帥四王騎兵三千焚
蠻萬人破橫山寨入靜江府旭烈兀大王遣其將郭侃西渡海諭
富浪降之復東渡收石羅子賓鐵兀林乞里彎等部而還洪福源
子茶邱從札刺兒帶伐高麗高麗王瞰計窮乃降遣其世子俱入
侍殺高麗軍民長官洪福源

九年春正月乙巳朔駐重貴山置酒大會上已遣降人晉國寶招
諭合州戊申合州守將王堅殺國寶遂命渾都海以兵二萬守六
盤乞帶不花守青居紐璘造浮橋於涪州蘭寺以杜援兵二月上
悉諸兵渡雞爪灘至石子山遂圍合州夏四月丙子大霖雨至於

乙未五月師屢攻合州不克六月汪德臣攻合州夜登其外城遲
明遇雨梯折乃還宋制置副使呂文德壞涪州浮梁率舟師泝嘉
陵江以援合州師與戰不利經略使史天澤進擊敗之追至重慶
而還是月鞏昌便宜都總帥汪德臣卒於軍上不豫秋七月辛亥
留精兵三千守合州餘悉攻重慶癸亥上崩於釣魚山壽五十有
二諸王大將以二驢蒙以繪樞負之北還葬起輦谷

論曰憲宗之立有遺議焉前史襲元史舊文未爲允也史又稱憲
宗能輯士卒皇子阿速歹獵騎傷稼責之復撻其近侍卒拔民蔥
卽斬以徇在蒙古治軍可謂肅矣夫古今稱強漢弱宋然王堅以
孤城罷卒抗毳旃之勁族卒乃師老解退雖憲宗不晏駕庸必克
乎蓋自平金以來中漢人之習錦衣玉食肌骨疏懈故金以是亡
而元人兵勢亦自是遂稍衰矣歷觀史策瞰欲谷之言有以哉

元書卷四

新甯劉能紀 刊
 門人曾 彬襄校
 門人曾士琮詳校

元書卷五

世祖本紀第五上

邵陽曾廉撰

世祖聖德神功文武皇帝名忽必烈太祖孫憲宗母弟也始號爲
 忽必烈大王憲宗既即位以諸弟惟王長且賢故盡付以漠南地
 漢人皆屬焉王開府金蓮川明年立經略司於汴而屯田唐鄧尋
 受京兆分地於是立京兆宣撫司益充軍實三年帥師征大理徇
 土蕃下之遂進平大理而還事在憲宗紀六年王城開平府而居
 之八年受命伐宋九年秋七月憲宗崩八月王渡淮入大勝關次
 於江北九月憲宗凶問至於軍末哥大王遣使請王早還正位繫
 天下望王恥無功益進圍鄂州是時大元帥兀良合台已破辰沅
 壁潭州城下而軍王乃遣將援兀良合台且勞問初憲宗之立也

太宗子孫皆不服諸王亦多心非之及以阿里不哥守和林和林祖宗之都天啟雄勝阿里不哥遂有覬覦之志至是以其腹心阿藍荅兒渾都海脫火思脫里赤急發兵謀自立諸王詭意欲使阿里不哥與王鬪故多陰通之者矣冬十一月發兵至於燕事聞王猶冀破鄂乃班師遲疑未能決江淮荆湖宣撫副使郝經進議勸王宜與宋和輕騎迎大行靈輿收皇帝璽召諸王會喪和林而以眞金太子鎮燕示天下形勢語在經傳中王乃以爲然會宋人亦遣使請和於是乃北還留邁鐵赤軍以迎兀良合台兀良合台乃自潞黃洲渡江而還閏月己丑王至於燕罷脫里赤所集兵中統元年春高麗王瞰卒時渾都海軍久屯六盤阿里不哥使劉太平霍魯海要結秦晉青居乞帶不花成都明里火者皆應之三月戊辰王至於開平波斯王旭烈兀自西域遣使來合丹阿只吉

率西道諸王塔察兒移相哥忽刺忽兒爪都率東道諸王皆會諸大臣合辭勸進王猶謙讓廉希憲商挺趙良弼等俱啟王宜早定大計辛卯卽皇帝位遣高麗世子僖歸國立爲高麗王夏四月戊戌立中書省王文統平章政事張文謙爲左丞以郝經爲國信使使於宋其月阿里不哥稱皇帝於和林五月詔建元中統大赦天下合吏戶禮以爲左三部兵刑工爲右三部立燕京益都濟南河南北京平陽太原眞定東平大名彰德西京京兆十路宣撫司左丞張文謙出爲大名彰德宣撫使廉希憲捕劉太平霍魯海下獄竝乞帶不花明里火者皆伏誅渾都海趨甘州秋七月癸酉燕京宣慰使禡禡行中書省平章政事燕京宣慰使趙璧平章政事張啟元參知政事丙子上白將擊阿里不哥於和林是月始寓祀祖宗於中書省宋人幽郝經於眞州八月廉希憲爲右丞立陝西四

川行中書省仍行省事宋兵臨漣州詔李壇勿攻九月阿藍荅兒自和林會渾都海兵破西涼合丹大王帥師及陝西四川宣撫使八春鞏昌權總帥汪良臣擊之於甘州東大破之阿藍荅兒渾都海伏誅詔就加廉希憲平章政事冬十月初行中統寶鈔十二月上至自和林次於燕郊始制祭享太廟祭服以土蕃僧八思巴爲帝師授玉印統釋教始立司天監太常寺羣牧所賜諸王末哥按只吉歹忽刺忽兒合丹忽刺出勝刺合兒塔察兒阿朮魯海都覩爾赤也不干兀魯忽帶只必帖木兒爪都伯木兒都魯牙忽阿只吉銀鈔綺帛綿絹及奉先朝后妃帖木倫斡者思兀魯忽銀鈔各有差是歲嗣于闐王阿魯忽留使者辭徹干不遣辭徹干逃歸命元帥不花帖木兒征之

二年春正月宋兵攻漣水江淮大都督李壇敗之二月丙午如開平詔減免民間差發罷守隘軍秦蜀行省給軍借用民錢償以今年稅賦丁巳李壇敗宋兵於沙湖堰三月壬戌朔日有食之左丞張文謙還夏四月丙午詔儒士被俘者聽贖爲民乙卯詔宣撫司勸農桑抑游惰禮高年問疾苦舉文學茂才異等其官濫汙及民不孝弟者議罰五月詔使臣及軍士所過官給廩餼無擾民弛山澤之禁禁私殺馬牛及越境私商販馬者丁亥以河南經略宣撫使史天澤爲右丞相西京霜六月禁諸王擅招民及私徵錢定鹽酒課稅法定中外官乘馬數各有差乙卯詔有司歲時釋奠孔子廟及書院諸官使臣軍馬侵褻者罪之庚申宋潼川安撫副使知瀘州劉整舉所屬降詔罷金銀銅鐵丹粉鉛礮坑冶所役民夫舞陽薑藤花戶還之州縣工局繡女聽其婚嫁高麗國王僨告更名植遣其世子諶來朝不花爲右丞相前領中書事耶律鑄爲左丞

相參知政事張啟元爲右丞秋七月始立軍儲都轉運司遣使祀
 嶽瀆西京宣德霜八月丁酉命開平府守臣釋奠孔子廟戊戌燕
 京宣撫使賽典赤瞻思丁平章政事辛丑西京宣撫使粘合南合
 爲右丞領燕京匠局闊闕爲左丞立開元女直水達達宣撫司丁
 未立勸農司甲寅封順天萬戶張柔安肅公濟南萬戶張榮濟南
 公詔自今使臣口稱上旨有司毋得輒聽諸王及后妃公主駙馬
 非聞奏毋得擅取官物九月庚申以徙中書省署奉遷祖宗神主
 於聖安寺辛酉藏於瑞像殿丙寅右丞粘合南合出行中興省事
 是月詔諭諸王駙馬毋得私斷詞訟始立各路提舉學校官冬十
 月辛卯遣道士訾洞春代祀東海廣德王庚子右丞張啟元出行
 平陽太原省事宋四川制置使俞興攻瀘州劉整敗之括西京馬
 以給新軍乙巳上復擊阿里不哥十一月壬戌戰於昔木土腦兒

大破之阿里不哥北遁壬申詔免諸路今年賦稅詔罷十路宣撫
 司徵其官赴燕惟開元勿罷十二月封子眞金爲燕王領中書省
 事甲午師還詔罷所在戍兵及新簽兵是歲忽魯不花爲左丞相
 塔察兒平章政事商挺楊果竝參知政事商挺仍行陝西四川省
 事

三年春正月修孔子廟制宮縣樂禁諸道戍兵及勢家縱畜牧犯
 桑棗禾稼者夔府路行省劉整入朝瀘州復入於宋二月李璫以
 漣海叛入於宋寇蒲臺宋人以兵應璫詔諸王合必赤總督蒙古
 漢軍平章政事趙璧出行山東省事以討之丙午左丞闊闕出爲
 大名宣慰使己酉平章政事王文統坐同璫謀反伏誅壬子李璫
 進據濟南三月平章政事禡禡出行陝西四川省事征行萬戶史
 樞宿衛將軍阿朮邀擊璫軍敗之濱州安撫使韓世安大破璫兵

於高苑夏四月修河中禹廟乙卯詔右丞相史天澤節制諸將以討李璫遂築環城圍濟南五月宋夏貴陷蘄縣權萬戶李義千戶張好古死之丁丑徐邳總管李杲哥坐降宋欺罔誅之是月宣德咸甯路霜河南眞定雨雹六月韓世安敗宋兵於濱州丁河口己丑遣平章政事塔察兒帥師以擊宋七月甲戌破濟南李璫伏誅益都降山東復定八月開玉泉水通漕運河閒平灤六路霜九月亳州萬戶張宏略擊宋兵破之復蘄縣安南入貢閏月免諸路軍戶他徭冬十月庚申詔諸王使臣師旅敢有恃勢擾民者所在執以聞乙卯禁京畿獵戊寅赦益都爲李璫所誣誤者十一月以眞定民馬榮納郝興賂忘殺其父忠之讎杖之沒其銀詔中書議有司失出之罪十二月立十路宣慰司及諸路轉運司初興鐵冶鼓鑄甲寅燕王守中書令癸亥寓祀祖宗於中書省仍藏神主於瑞

像殿戊寅詔隆興路起行宮是歲封爪都爲廣甯王于闐王阿魯忽來歸以其軍及大名王禾忽破哈刺不花之眾於不刺城斬之四年春正月丙戌大司農姚樞爲左丞立十路奧魯總管禁民家兵器及蒙古軍擾民者惟聽獵戶及捕盜巡鹽者執弓矢二月甲子如開平三月癸卯詔建太廟是春廉希憲還平章政事商挺還參知政事征南都元帥汪良臣攻重慶及宋人戰大敗之夏四月大雨雹武州霜五月乙酉初立樞密院燕王兼判樞密院事戊子詔以開平府爲上都六月癸酉詔建帝堯廟於平陽右丞相不花左丞相忽魯不花罷線眞爲右丞相平章政事塔察兒爲左丞相禁煎販私鹽燕京河閒益都東平蝗秋七月立互市於樊城遂置堡鹿門及白鶴山燕京大雨雹八月參知政事商挺出行四川樞密院事甲子敕諸臣傳旨有疑者須覆奏壬申至自上都是秋洪

茶邱訴其父福源冤命茶邱襲其父職為高麗軍民總管冬十一月丙戌仍寓祀事於中書省是歲斷死囚七人建昌落蘭蠻建蒂反

至元元年春正月立諸路平準庫二月疏雙塔漕渠癸酉如上都弛邊城軍器之禁夏四月東平太原平陽早遣僧禱雨五月己亥陝西四川行省粘合南合平章政事六月高麗王禎來朝秋七月有彗星出於輿鬼益解州鹽課庚子阿里不哥及諸王阿速歹玉龍荅失昔里吉自歸於上都詔釋不問其屬孛魯合忽察突滿阿里察脫火思坐構亂皆伏誅八月立諸路行中書省詔新立條格省併州縣定官吏員數分品從官職給俸及頒公田計日月以考殿最均賦役招流移勿擅用官物勿以官物進獻勿借易官錢勿擅科差役凡軍馬不得停泊村坊詞訟不得隔越陳訴恤鰥寡勸

農桑驗雨澤平物價具盜賊囚徒起數月申省部又定諸王使臣驛傳稅賦差發申禁擅招民戶及口傳敕旨追呼省臣官屬者庚戌命燕王署敕癸丑劉秉忠為太保參預中書省事同議樞密院事乙卯詔定都燕京以為中都丁巳詔改元大赦天下九月壬申初立翰林國史院辛巳至上都冬十月奉安神主於太廟庚戌遣官享於太廟是月高麗王禎來朝禁上都畿內捕獵十一月遣兵征骨嵬壬辰阿合馬平章政事阿里別為左丞十二月罷諸路世守官立遷轉法是歲立總制院平章政事趙璧改樞密副使商挺還參知政事平章政事賽典赤瞻思丁出行陝西四川省事左丞張文謙出行西夏中興等路省事張惠參知政事行山東省事二年春正月辛未朔日有食之戊子塔察兒國王使臣闊闕出殺花道驛吏詔徵鈔十錠給其主以贖死癸巳八東乞兒部牙西來

元書 卷五
貢二月辛丑潼川元帥按東與宋兵戰於釣魚山敗之丁巳如上
都癸亥析左右部爲四吏禮及兵刑合戶工分甲子寶合丁平章
政事王晉參知政事三月敕邊軍習水戰且屯田閏五月平章政
事廉希憲出行東平濟南益都淄萊等路省事樞密副使趙璧復
平章政事出行南京河南大名順德洛磁彰德懷孟等路省事左
丞姚樞出行西京平陽太原等路省事夏六月己卯高麗遣使賀
天壽聖節參知政事王晉罷秋七月安南來貢八月己卯諸宰執
皆罷安童爲右丞相伯顏爲左丞相戊子至上都九月宋制置
使夏貴攻潼川都元帥劉元禮大敗之冬十月享於太廟尊皇祖
爲太祖是歲封諸王兀古帶河閒王宋主的殂子禩立

三年春正月壬子立制國用司二月丙寅廉希憲宋子貞竝平章
政事張文謙爲左丞史天澤爲樞密副使壬午張易爲右丞張惠
參知政事竝預制國用司事癸未如上都三月己未王晉及侍中
和哲斯濟南益都轉運使王明皆坐隱匿鹽課棄市夏五月乙未
遣使慮囚六月丁卯封子那木罕爲北平王戊寅嚴陝西河南竹
禁九月戊午至上都冬十月丁丑徙平陽經籍所於京師更敕
牒舊式是月太廟成追上四世廟號尊諡曾祖考曰烈祖神元皇
帝妣曰宣懿皇后皇祖考曰太祖聖武皇帝妣曰光獻皇后皇伯
考曰太宗英文皇帝妣曰昭慈皇后皇考曰睿宗景襄皇帝妣曰
莊聖皇后皇兄曰定宗簡平皇帝后曰欽淑皇后皇兄曰憲宗桓
肅皇帝后曰貞節皇后以及皇伯考朮赤妣別土出迷失皇伯考
察合台妣阿昔倫無諡號位睿宗上竝爲入室焉歲用冬享祀如
禮十一月辛卯初給京府州縣司官吏俸及職田丁未平章政事
宋子貞致仕辛亥忽都答兒爲左丞相禁天文圖讖書是月宋人

復取大良十二月甲子立諸路洞冶所丁亥上都起大安閣劉元
禮城眉州是歲諸王海都反遂發兵攻畏吾兒虜其民

四年春正月癸卯詔修曲阜孔子廟乙巳百濟遣使來朝禁僧官
侵理民訟辛亥進封張柔蔡國公趙璧爲樞密副使戊午城中都
二月庚申粘合南合復平章政事阿里別復爲右丞丁卯改經籍
所曰宏文院丁亥上都括西夏民田三月己丑耶律鑄爲左丞
相辛丑夏津大雨雹丁巳詔名宮縣樂曰大成樂夏四月甲子新
築宮城五月丁亥朔日有食之詔上都重建孔子廟丙申威州山
後大番弄麻來附壬子敕令包銀民戶四增其一以充官俸六月
乙丑史天澤爲左丞相降忽都荅兒耶律鑄並平章政事伯顏爲
右丞廉希憲爲左丞阿里別張文謙並參知政事秋八月丁丑封
子忽哥赤爲雲南王壬午命招討使怯縣征建昌征南都元帥阿

朮伐宋襄陽遂侵江陵及宋人戰大敗之九月安南王光昺遣使
入貢詔置達魯花赤於安南以治之癸丑至自上都冬十月庚辰
定品官子孫廕敘格宋人復取開州

五年春正月庚午上都建城隍廟夏六月甲申中山大雨雹己酉
封憲宗子昔里吉爲河平王秋七月癸酉始立御史臺塔察兒爲
御史大夫阿里爲御史中丞八月庚子忙兀帶帥師征建昌九月
丁巳建堯廟及后土太甯宮詔都元帥劉整會征南都元帥阿朮
擊襄陽遂城白河口及鹿門新城等堡逼之乙丑至自上都左丞
相史天澤復爲樞密副使冬十月戊寅朔日有食之己卯敕中書
省樞密院事須御史臺官同奏參知政事阿里別出行河南省事
庚辰御史中丞阿里參知政事帖只爲御史中丞乙未設起居注
官戊戌允劉秉忠辭領中書省事仍以爲太保十二月敕歲分至

及天壽聖節祭星於司天臺榷四川茶是歲耶律鑄復爲左丞相六年春正月戊午征南都元帥阿朮軍入宋復州等地俘萬人而還甲戌詔樞密副使史天澤樞密副使駙馬忽刺出董師襄陽二月己丑詔頒行蒙古新字於天下丁酉詔簽民兵二萬赴襄陽禁鞍鞞箭鏃等物飾黃金免單丁貧乏軍士一千九百餘戶爲民三月宋京湖都統張世傑援襄陽戰於赤灘圍敗走夏五月征討使怯縣坐失律擅追唆火兒璽書金符誅死河南北山東蝗秋七月壬戌西京大雨雹己巳立蒙古字學癸酉立國子學遣使慮囚是月大霖雨漢水溢宋沿江制置副使夏貴帥舟師援襄陽襲新城阿朮敗之於虎尾洲復擊范文虎之師於灌子灘敗之八月詔諸路勸課農桑高麗令公林衍廢其主禎而立禎弟湄九月辛未至自上都冬十月詔召高麗王禎王弟湄及林衍皆赴闕命國王頭

輦哥領兵壓其境樞密副使趙璧爲左丞出行東京省事十二月高麗都統領崔坦以其國西京五十餘城內附庚午高麗王禎遣使告復位十二月己丑作佛事於太廟

七年春正月丙午左丞相耶律鑄左丞廉希憲並罷忽都答兒爲左丞相許衡爲左丞罷制國用使司立尙書省阿合馬張易並平章尙書政事張惠李堯咨麥朮丁竝參知尙書政事參知政事張文謙罷爲司農卿甲寅詔以高麗西京爲東甯府二月辛未右丞伯顏改樞密副使甲戌築昭應宮於高梁河乙未宋襄陽出水陸軍突萬山行軍萬戶張宏範擊敗之高麗王禎來朝詔國王頭輦哥舉軍入高麗護禎還國赦安慶公湄而購執林衍三月庚子朔日有食之甲寅如上都浚武縣御河征南都元帥阿朮都元帥劉整築實心臺於漢水中以扼宋舟竝造戰艦練水軍七萬夏四月

檀州隕黑霜三夕高麗林衍死其黨裴仲孫立其王庶族爲王據
珍島五月辛丑河內大雨雹陝西僉省也速帶兒四川僉省嚴忠
範及東西川兵與宋人戰於嘉定重慶釣魚山馬湖江皆敗之威
州汝鳳川番族內附丙辰括人戶秋七月庚申初給軍官俸都元
帥也速解兒伐宋光州敗宋兵於金剛臺御史中丞帖只爲御史
大夫孛羅爲御史中丞八月史天澤合諸將築長圍起萬山包百
丈楚山盡鹿門以困襄陽庚辰塔察兒同知樞密院事丙寅括河
西戶定田稅宋殿前都指揮范文虎救襄陽征南都元帥阿朮敗
之於會丹灘冬十月戊辰敕兩省已奏事皆報御史臺癸酉敕宗
廟祭文書國字乙亥宋人攻莒州己丑敕來年太廟用豕易以豕
豕時果求之內園勿市是月至上都閏十一月戊辰禁緇段織
日月龍虎及以龍犀飾鞍者十二月丙申敕歲祀太社太稷風師

兩師雷師立大司農司丁未金齒驃國內附獻馴象馬建大護國
仁王寺於高梁河是歲大理宣慰使都元帥寶合丁及王傅闊闊
帶享雲南王忽哥赤而酖之其夕雲南王忽哥赤薨
八年春正月敕築都城所徙民居計戶償之丁亥參議樞密院事
費寅謀叛伏誅壬辰敕給民鰥寡孤獨者廬舍薪米二月乙未朔
定民間婚聘禮幣貴賤有差丁酉築宮城癸卯左丞趙璧爲中書
右丞乙巳寶合丁闊闊帶伏誅三月辛巳濱棣萬戶韓世安有罪
棄市籍其家甲申上都乙酉中書左丞許衡罷爲集賢大學士
國子祭酒己丑制封燕王乳母趙氏幽國夫人竝進封其夫德育
公夏四月戊午征南都元帥阿朮敗宋范文虎之師於湍灘獲其
統制朱勝五月詔陝西四川行省賽典赤贍思丁僉省鄭鼎將兵
出嘉定東川副統軍汪良臣及彭天祥出重慶札刺不花出江安

元書 卷五
曲立吉思出汝州以伐宋丙寅牢魚來貢己卯命史天澤平章軍國重事高麗珍島賊散入耽羅秋七月壬辰立回回司天臺設官屬乙亥鞏昌平涼臨洮蘭會霜乙酉襄陽遣將米興國出攻百丈山阿朮擊敗之高麗珍島民降八月壬辰朔日有食之己未天壽聖節受朝賀初起朝儀壬子至上都甲戌太廟殿柱壞告廟葺之丙子敕享太廟無用犧牛癸未詔以四川民困免稅茶鹽仍敕有司自今有言茶鹽之利者以違制論十一月辛酉敕品官子孫徼直乙酉詔建國號曰元

九年春正月甲子併尚書省入中書省阿合馬張易仍平章政事張惠爲左丞李堯咨麥朮丁仍參知政事丁丑詔西平王奧魯赤征建昌辛巳敕燕王眞金遣使持香旛祀嶽瀆后土及五臺興國寺壬辰改中都曰大都戊申如上都三月蒙古都元帥阿朮漢軍

都元帥劉整阿里海牙破樊城外郭夏五月宋京湖制置大使李庭芝遣將張貴張順自均房清泥河順流犯圍入襄陽阿朮等邀斬張順秋八月丙戌朔日有食之乙丑禁諸人以己事輒呼至尊稱號者乙巳至上都九月甲子宋都統張貴出自襄陽以輪船順流突戰阿朮等邀之於龍尾洲斬之遂斷宋人襄樊浮橋冬十月丙戌封子忙哥刺爲安西王癸巳趙璧平章政事平章政事張易改樞密副使己卯宋遣使封劉整爲燕王整奏之命殺其使十二月成都僉省嚴忠範坐與宋將咎萬壽戰敗績失成都外城縛至都免其官是歲立秘書監建大聖壽萬安寺

十年春正月命鳳州經略使忻都右衛副都指揮使鄭溫高麗軍民總管洪茶邱征耽羅癸亥克樊城二月雲南羅羽酋阿朮反丁未宋京西安撫使知襄陽府呂文煥舉城降三月丙寅立宏吉刺

氏爲皇后立燕王眞金爲皇太子癸酉平章政事耶律鑄罷仍平章軍國重事張惠爲右承是日如上都客星見於畢青白如粉絮夏四月癸未平章軍國重事史天澤行荆湖樞密院事丁酉敕南儒被略賣者官贖爲民五月戊辰詔諸路罪囚非殺人者悉縱之合秋白詣京師六月戊申經略使忻都等定耽羅置招討使戊之秋八月赦罪囚至大都者二十二人九月辛巳遼東飢弛獵禁合伯平章政事丙戌置東宮宮師府詹事官屬戊子禁京畿五百里射獵己丑敕自今秋獵鹿豕先薦太廟丙午至自上都冬十月癸卯立會同館庚申合荅帶爲御史大夫初起正殿及寢殿香閣西平王奧魯赤及川陝僉省也速帶兒攻建昌蠻禽其酋建昌降十二月宋淮西制置使夏貴攻正陽淮西行院軍破走之聶古伯反北平王那木罕及孛兀兒出王討平之是歲進安西王忙哥刺

爲秦王樞密副使伯顏同知樞密院事

十一年春正月己卯朔始御正殿受朝賀庚寅初立軍官升散官格免諸路軍雜賦立建昌甯遠都護府二月壬申如上都三月辛卯詔伯顏史天澤竝爲左丞相阿朮平章政事阿里海牙爲右丞呂文煥參知政事行中書省於荆湖合荅爲左丞相阿塔海爲右丞劉整爲左丞塔出董文炳竝參知政事行中書省於淮西以伐宋癸巳詔獎良吏獲嘉縣尹常德優賞之夏四月癸丑初建東宮秋七月高麗國王禎卒冊其世子諶爲高麗國王八月太保劉秉忠薨史天澤有疾召還詔伯顏專征改淮西行中書省爲行樞密院九月癸巳至上都伯顏阿朮浮漢南下宋人盡銳阻郢州伯顏潛舟唐港以出於漢十二月復潛出沙蕪口達舟於江遂渡江鄂州降

十二年春正月江淮諸州郡以次降以兵部尚書廉希賢工部侍郎嚴忠範奉國書使於宋敕追諸王海都八刺金銀符二月詔分左右軍右軍受伯顏阿朮節度以博羅歡爲右丞兼淮東都元帥節制左軍會蒙古漢軍於邳州竝河南戰船千赴之詔立后土廟於臨汾立伏羲女媧舜湯河瀆等廟於河中解州及洪洞趙城縣戊申平章軍國重事史天澤薨宋右丞相賈似道督孫虎臣夏貴軍陳於丁家洲右軍攻之宋師潰獲其船械督府圖籍符印遂進克建康府江東諸路平庚午如上都宋人始歸國信使郝經三月詔以西平王奧魯赤征土蕃廉希賢嚴忠範至獨松關爲宋人所殺阿里海牙進兵收荆湖克岳州至江陵宋荆湖宣撫使朱禎孫湖北制置副使高達舉所屬降湖北路平六月庚子朔日有食之西川行院副使汪良臣攻嘉定宋成都安撫使咎萬壽以嘉定降

辛酉宋瀘州降阿朮會左軍進攻揚州秋七月阿朮敗宋沿江制置使趙潛樞密都承旨張世傑知泰州孫虎臣之師於焦山詔伯顏帥諸將趨臨安右丞阿里海牙進取湖南蒙古萬戶宋都帶同漢軍三萬戶及兵部尚書呂師夔行都元帥府取江西竝罷淮西行院以右丞阿塔海參知政事董文炳同署行中書省事甲午伯顏爲右丞相阿朮爲左丞相是月詔北平王那木罕率諸王牙忽都出鎮阿力麻里右丞相安童從王行中書省樞密院事以備邊丙申玉昔帖木兒爲御史大夫八月辛酉至上都九月戊寅敕太廟牲仍用牛冬十一月阿剌罕將步騎出獨松關董文炳將舟師出澈浦伯顏自將中軍出常州以向臨安己卯宋都帶至隆興宋江西轉運使知隆興府劉槃舉城降江西路以次平十二月戊申左丞相忽都答兒率百僚耆庶請上皇帝尊號曰憲天述道仁

文義武大光武皇帝皇后尊號曰貞懿順聖昭天睿文光應皇后
不許是歲立蒙古翰林院諸王篤哇反敗威遠王阿只吉西平王
奧魯赤之眾進圍畏吾兒都六閱月亦都護火赤哈兒堅守不下
乃解

十三年春正月丁卯朔阿里海牙克潭州湖南路以次平甲申伯
顏至臨安董文炳阿剌罕之師會於皋亭山宋主熲遣使齎傳國
玉璽以降甲午真定總管昔班爲右丞二月丁未詔宋人諸抗拒
及嘯聚者皆赦其罪高尚名士及雜流通曉天文秣數者有司以
名聞繆寡孤獨量給之戊午宋淮西制置大使夏貴舉所部降淮
西平辛酉如上都三月丁卯伯顏入臨安籍宋太廟四祖殿景靈
宮禮樂器冊寶郊天儀仗及秘書省國子監國史院學士院太常
寺圖書器物戊辰括江南州郡軍器丁丑以宋主及其母全氏福

王與芮入朝庚寅右丞昔班罷爲戶部尙書閏月甲子郝禎參知
政事是月宋右丞相陳宜中保康軍節度使張世傑等復立益王
昞於福州淮東制置大使李庭芝遣揚州都統姜才帥四萬人襲
瓜洲以奪宋主熲大軍擊敗之夏四月庚寅詔脩太廟五月乙未
授宋主熲開府儀同三司檢校大司徒封瀛國公以平宋遣官告
祭天地太廟竝嶽瀆荆湖右丞相伯顏復同知樞密院事庚子定
度量乙巳左軍博羅歡軍拔秦州新城六月己巳以曲阜縣尹孔
治兼權主孔子廟祀事辛未詔行省右丞阿里海牙進取廣西是
月宋涪州安撫使楊立以城降宋四川制置副使張珏陷瀘州秋
七月乙巳宋淮東制置副使朱煥以揚州降乙卯泰州降獲宋右
丞相李庭芝淮東路平八月庚辰至自上都九月己亥享太廟易
祭品以野豕鹿羊蒲萄酒癸卯大赦天下是月行省參知政事阿

元書 卷五
刺罕左丞董文炳招討使唆都將舟師出明州行省參知政事塔
出呂師夔左副都元帥李恆將步騎出江西分道路閩廣冬十一
月阿刺罕董文炳破宋秀王與釋兵於瑞安斬與釋兩浙路平宋
益王昞遁入海福州降十二月庚寅詔浙東西江東西淮東西湖
南北諸萬千戶所奪民悉還州縣各將校及宋官吏所奪民田廬
產業悉歸其主無主則以給附近民無產者其租稅課從實故宋
繁冗科差悉除之是月泉州降阿里海牙克靜江廣西路以次平
宋張珙復陷涪州是歲平章政事趙璧薨大司農張文謙爲御史
中丞中丞李羅爲御史大夫河平王昔里吉及滅里大王脫脫大
王藥木忽兒王脫帖木兒俱舉兵反攻北平王那木罕於阿力麻
里掠憲宗所御大帳牙忽都王爲所執漢軍都元帥李庭擊叛王
撒里蠻敗之

十四年春丙申詔免諸路今歲絲銀賜嗣漢天師張宗演號爲演
道靈應冲和真人領江南道教己未置江淮等路都轉運鹽司榷
茶都轉運司二月癸亥有彗星出於東北戊辰祀先農於東郊甲
戌如上都以僧楊連真加掌江南釋教庚寅禁祈賽神社及酒是
月廣東路皆降御史大夫李羅改樞密副使夏四月淮人張德興
復爲宋據司空山陷黃州壽昌軍湖北宣慰使鄭鼎與戰於樊口
敗績死之宋廣東制置使張鎮孫入廣州宋右丞相文天祥出江
西六月入興國縣七月天祥遣兵圍贛州宋樞密副使張世傑圍
泉州邵武復入於宋八月昔里吉劫北平王那木罕於阿力麻里
械繫右丞相安童遂以西道諸王兵犯和林詔同知樞密院伯顏
帥師禦之忽魯帶王來歸丙午立江南行御史臺戊申東川都元
帥張德潤復涪州丁巳壽昌黃州復八月戊午詔合丹闊里吉思

領東川行樞密使攻合州不花李德輝領四川行樞密使攻重慶
 乙丑詔新作太廟辛未上田於上都北常德府總管魯希文坐與
 李三俊謀亂伏誅己未克司空山斬德興其月江西宣慰使李恆
 遣將援贛州而自趨興國破走天祥九月江西參知政事也的迷
 失復邵武福建宣慰唆都分兵援泉州走世傑伯顏大破昔里吉
 於斡兒寒河復得大帳牙忽都王脫歸冬十月丙辰朔日有食之
 征南都元帥韓文安破萬州塔出圍廣州張鎮孫舉城降十一月
 復瀘州庚子吏部尚書別都魯丁參知政事十二月乙亥參議省
 事耿仁參知政事楊文安克純安府是冬禿魯王反於六盤鞏昌
 都總帥汪惟正討禽之其歲別里鐵穆兒王征昔里吉襲敗其黨
 脫忽於也兒的石河罷大司農司

元書卷五

門人

門人

門人

新甯劉能紀 刊
 門人曾廣載襄校
 門人曾士琮詳校

元書卷五上

元書卷五

邵陽曾廉撰

世祖本紀第五下

十五年春正月己亥詔買賣江南良家子女爲賤及倡者兩罪之
 仍沒其直人復爲良戊申授宋福王與芮金紫光祿大夫檢校大
 司農平原郡公二月戊午祀先農以蒙古胄子代耕藉田辛未以
 川蜀嵐瘴開酒禁壬午立太史院峻都克潮州屠其城是月西川
 行院不花汪良臣圍重慶及宋四川制置副使張珩戰於扶桑壩
 珩兵大潰其都統趙安以重慶降珩東走執之三月壬申以歲荒
 免諸路今年田租癸卯楊文安克紹慶府是月宋夔州降夏四月
 丙辰詔江南未靖行省分道撫治軍民檢覈錢穀察郡縣被災甚
 者舉廉能吏以聞其貪殘不勝任者劾罷之戊辰宋益王昰殂於

宋書 卷五
一
碭州宋人立其弟衛王昺丁丑雲南臨安白衣和泥威楚金齒落
落及禿老蠻高州筠連州等所來降五月癸未詔今後進用宰執
及主兵重臣其與儒臣老者同議六月甲戌詔中書省樞密院御
史臺翰林院及諸南儒今爲宰相宣慰及各路達魯花赤佩虎符
者俱多謬濫其議減汰凡政事順民欲者行之不欲者罷之乙亥
敕省院臺應聞奏事必由起居注戊寅全州西延溪峒徭蠻內附
己卯詔張宏範爲蒙古漢軍都元帥平宋遺族庚辰安南來貢秋
七月壬午宋湖南制置使張烈良提刑劉應龍以兵應衛王昺阿
里海牙襲斬之於烏龍洞羅氏鬼國來附丙午定江南官祿俸職
田冬十月至自上都十一月甲午開酒禁閏月甲子張宏範襲宋
師於五坡嶺執文天祥歸京師是歲立宣徽院漳州陳弔眼反有
眾五萬陷本州安南王光昺卒世子日烜立

十六年春正月宋合州安撫使張立遣閒使詣西川行院以其城
降四川平甲戌都元帥張宏範追宋衛王昺於厓山其左丞相陸
秀夫負衛王昺投海死宋亡是月宋樞密副使張世傑溺死海陵
港福建廣東皆平二月戊寅祭先農於藉田乙未禁諸奧魯及漢
人持弓矢其出征兵仗皆輸官庫甲辰如上都三月戊申禁歸德
亳壽臨淮田獵庚子敕同知太史院郭守敬繇上都大都歷河南
抵南海測驗暑景甲戌定州縣社稷禮制夏六月甲辰占城及馬
八兒國貢象犀秋七月西南八番來附八月丁丑至上都冬十
月壬寅詔皇太子參決朝政是歲起聖壽萬安寺命四川副都元
帥劉恩趨幹端討于闐王阿魯忽安南王日烜自立不朝詔徵之
日烜以其叔父遺愛入覲

十七年春正月丙辰立遷轉法及差稅課程括江南銅丁卯田於

近郊二月丁丑詔大理都元帥納速刺丁將兵征緬三月甲辰如上都乙卯立都功德司羅氏鬼國復叛己未詔四川都元帥藥刺海招討使張萬家奴湖南行省平章政事阿里海身三道出師討之夏四月庚子敕權停百官俸甯海四郡霜五月甲辰起察罕腦兒行宮丙午括沙州戶丁定常賦六月丁丑秦王忙哥刺薨秋七月戊午參知政事郝禎耿仁並遷左丞八月占城及馬八兒國入貢建甯人黃華反征蠻都元帥完者都討降之九月壬子至自上都壬戌更以四川都元帥也罕的斤征斡端丁卯羅氏鬼國降以爲順元路己丑遣招討使都實窮河源十一月甲子詔頒行授時秣十二月庚午殺江淮行省平章政事阿里別右丞燕帖木兒左丞崔斌甲午重建太廟成奉遷神主行大亨禮乙未毀舊廟左丞相阿朮巡歷西邊丙申薨於別失八里是歲皇孫阿難荅襲封安

西王也先帖木兒襲封雲南王權江西茶

十八年春正月丙辰行幸鄒州二月辛未行幸柳林丙戌阿剌罕爲左丞相張禧平章政事范文虎洪茶邱爲右丞李庭爲左丞並行征東省事以征日本乙未皇后宏吉刺氏崩丙申車駕還宮三月丙午如上都辛酉立登聞鼓院詔皇太子行邊夏四月辛未復給中外官俸五月庚申嚴鬻人之禁乏食者量賑貸之壬戌括契丹戶阿剌罕有疾六月庚寅阿塔海代爲左丞相秋七月己亥阿剌罕卒於軍辛酉占城來貢犀象八月范文虎等遇颶風棄其師於平壺島而還閏月丙午至自上都丁巳敕中書省減知政及諸司冗員括江南戶口稅課壬戌兩淮轉運使阿剌瓦丁有罪誅死償謙州站匠助軍羊馬價九月癸亥田於近郊壬辰占城來貢冬十月乙未享於太廟附皇后宏吉刺氏己亥以安南國王日烜違

命詔諭其國人立日烜叔父遺愛爲王丁未立安南宣慰司己酉立占城行省峻都爲右丞劉深爲左丞也里迷失參知政事撫治占城癸丑皇太子還自北邊十二月甲午甕吉刺帶爲右丞相己亥罷征東行中書省是歲四川都元帥劉恩進兵斡端海都將玉論亦撒來援敗之旣而海都遣八把以眾三萬復至恩師遂還閩廣大都督塔里赤禽斬陳弔眼復漳州

十九年春正月撒里蠻誘執昔里吉以降北平王那木罕及右丞相安童乃歸詔改封那木罕北安王復鎮阿力麻里丙子田於近郊二月辛卯行幸柳林修宮城太廟司天臺癸巳詔四川都元帥也速答兒湖南行省脫里察雲南行省愛魯征亦奚不辭戊申車駕還宮壬子諸王相吾答兒督雲南行省右丞大卜參知政事也罕的斤以征緬甲寅如上都丁巳安州張拗奴詐爲敕印伏誅三

月辛酉益都千戶王著詐傳皇太子令使樞密副使張易發兵夜會東宮殺平章政事阿合馬左丞郝禎囚右丞張惠壬午著伏誅易坐臨變不審棄市夏四月丁酉守司徒翰林學士承旨和禮霍孫爲右丞相甕吉刺帶罷爲留守仍同僉樞密院事庚戌以興師海外天下疲轉餉詔慰諭軍民應有逋欠錢糧及官吏侵盜並權停徵五月己未瀘州總管李從有罪棄市詔戮阿合馬尸而暴之沒其家屬財產罷江南財賦總管府癸未右丞張惠參知政事阿里並罷甘肅左丞麥朮丁爲右丞行臺中丞張雄飛參知政事六月己丑朔日有食之戊戌以占城王子補的專國執使者詔峻都發淮浙福建湖廣軍討之丁巳亦奚不辭平立三路達魯花赤治之秋七月戊午朔日有食之辛酉戮郝禎尸戊寅築阿失答不速皇城乙酉閣婆來貢八月甲寅天壽聖節車駕還宮乙卯御殿受

賀九月丁巳籍阿里家辛酉俱藍那旺蘇木都刺等國來貢壬戌
敕中外官吏受賄及倉庫官侵盜臺察官知而不糾者驗輕重罪
之丁卯安南來貢乙亥遣使括雲南金釐正選法令諸路歲貢儒
吏各一人各道提刑按察司舉廉能升敘是月阿合馬子阿散實
都兄弟子別都魯丁宰奴丁及其黨耿仁並誅死冬十月丁亥增
兩浙鹽價整治鈔法辛卯平章軍國重事耶律鑄復爲左丞相庚
戌禁大都及山北州郡酒籍京畿隱漏田履畝稅之乙卯臨阿合
馬子忽辛抹速忽於揚州十一月丁卯以故宋衍聖公孔洙爲國
子監祭酒提舉浙東學校與護持林廟璽書十二月壬辰昭文館
大學士領太史院張文謙爲樞密副使乙未發遣瀛國公趙昱居
上都殺宋故右丞相文天祥癸卯右丞札散平章政事詔御史臺
自選其屬立京畿江淮都漕運司是歲刑部尙書崔或爲御史中

丞諸王合班元帥忙古帶軍至斡端及阿魯忽戰敗之阿魯忽乃
降安南王日烜殺其叔父遺愛

二十年春正月己未納皇后宏吉刺氏乙丑禁匿名書告事詔諸
有事須訴臺省有理決不平許詣登聞鼓院擊鼓以聞立務農司
復立征東行中書省阿塔海復爲左丞相程鵬飛平章政事閣里
帖木兒爲右丞劉國傑爲左丞以征日本丙寅詔自今管民官凡
有災傷過時不申及按察司不卽行視者皆罪之辛未唆都擊破
占城兵二十萬又大敗之於大浪湖占城王孛由補刺者吾及其
子補的皆遁壬午田於近郊二月敕歲以春秋仲月上戊日祭社
稷及武成王辛丑立軍官選格立官吏贓罪法甲寅遣官錄揚州
囚徒是月唆都追攻占城王於鴉候山不克軍士多潰遂造木城
耕於占城三月丙寅如上都癸酉新會人林桂方反自號羅平國

官軍討平之夏四月癸卯更以高麗王昉爲征東行省左丞相庚戌四川右丞也速答兒招降筠連定州阿永諸蠻禽都掌酋得蘭紐以歸六月己丑詔增中外官吏俸四川參知政事曲里吉思平五溪蠻秋八月癸未明里察平章軍國重事九月丙寅詔合併荆湖占城行中書省以平章政事阿里海牙益兵南征辛未開酒禁是月相吾答兒王自中慶與大卜也罕的斤分三道以入緬冬十月行幸古北口壬辰車駕還宮甲午平章政事札散改樞密副使庚子左丞相耶律鑄坐事罷並沒家貲之半建甯路總管黃華復反圍本路稱祥興五年征東左丞劉國傑江淮參知政事伯顏浙西宣慰使高興等討平之十一月相吾答兒王破緬江頭城擊殺數萬人遂進攻建都大公城拔之十二月丙午定質子令凡大官子弟遣赴京師樞密副使張文謙卒是歲始由海漕粟輸京師溫

迪罕參知政事

二十一年春正月乙卯右丞相和禮霍孫率羣臣上尊號曰憲天述道仁文義武大光孝皇帝赦天下丁卯建都王烏蒙及金齒十二部皆降二月浚揚州漕河邕州賓州人黃大成等及梧州韶州衡州人民同時爲亂湖南宣慰使撒里蠻將兵討之丁未括江南樂工命阿塔海發兵船助征占城盜起漳州秦州總管劉發坐嘗通反者誅死遷故宋宗室及大臣之仕者於內地三月丁巳北安王那木罕及安童還自阿力麻里丙寅如上都丁卯太廟正殿成奉安神主夏四月戊申高麗王昉及其妃忽魯都堅迷失公主以其世子諫來朝五月庚午括天下天文圖讖等書私藏習者罪之是月萬戶忽都忽馬兒劉君慶將揚州兵二萬以援唆都不克至而還閏月安南來貢玉杯金瓶珠條金領及白猿綠鳩丙午修大

都城六月壬子遣使分道測驗晷景日月交食秣法甲寅封皇子脫歡於鄂州曰鎮南王秋七月荆湖西川討义巴散毛洞蠻戊子詔鎮南王脫歡荆湖左丞李恒假道安南會峻都軍以討占城八月丁未雲南華帖白水江鹽井蠻反殺行省使者發兵討之占城國王請回峻都軍仍歲修職貢庚午至自上都九月甲申地震丙申籍僧楊連真加發取宋陵金寶以修天衣寺甲辰海南貢白虎師子孔雀十一月甲申封南木里忙哥赤爲郡公庚寅占城遣使賀天壽聖節獻禮幣及象二其舊州主亦奉表降庚子范文虎爲左丞商量樞密院事辛丑右丞相和禮霍孫右丞麥朮丁參知政事張雄飛溫迪罕皆罷安童復爲右丞相前江西權茶運使盧世榮爲右丞前御史中丞史樞爲左丞廉希恕撒的迷失並參知政事敕整治鈔法定金銀價禁私自回易官吏奉行不虔者罪之癸

卯南巫里別里刺理倫大力四國入貢方物詔募自襄陽至東海墾荒田免其六歲租稅十二月甲辰立江南官田手實法辛亥行官酤丙寅八番龍昌甯龍延萬等來貢是月鎮南王脫歡至祿州安南王日烜發兵拒守脫歡遂分兵六道以入安南安南逆擊之於萬劫萬戶倪閏至劉村戰死

二十二年春正月戊寅弛天下金銀竹貨澤梁之禁遣使慮囚濬蒙村漕渠庚辰毀故宋郊天臺以建寺壬午立市舶都轉運司立諸路常平鹽鐵坑冶都轉運司戊子封駙馬峻都哥甯昌郡王西川趙和尚自稱宋福王子廣王眞定民劉魯兒自揚異表三乳皆坐謀不軌磔以徇乙未流征占城將帥擅還者二十三人丙申田於近郊行臺大夫阿必失哈平章政事荆湖占城行省平叛蠻百六十六洞辛丑陽兀魯帶爲招討使以征骨嵬是月破安南兵於

富良江日烜棄城遁日烜弟陳益稷以其宗族降鎮南王脫歡遂入安南二月乙巳行幸柳林穿河西務河辛亥廣東宣慰使也的迷失平惠潮盜壬戌立規措所以善賈人爲官吏回買江南民士田收天下銅錢申禁私造酒麴戊辰如上都獲吉刺帶復爲左丞相己巳忽都魯平章政事復立按察司三月丙子遣太史監候張公禮彭質等往占城測候日晷詔荆湖行省助征安南夏四月安南兵大起鎮南王脫歡引兵還李恆殿中藥矢卒峻都自占城來會師安南邀之於乾滿江死之遣省院臺官慮囚五月甲戌御史中丞郭佑參知政事秋七月壬子造溫石浴室更衣殿癸酉禁獵八月丙辰至上都九月罷椎酤丙子眞臘占城入貢並獻樂工十人丙戌蘇木都刺馬答遣使入朝烏蒙叛四川行院也速答兒討之是秋同知樞密院伯顏鎮別失八里以備邊冬十月癸丑征

東行省更以洪茶邱爲右丞陳巖爲左丞丙辰參議省事帖木兒參知政事馬法入貢十一月乙未右丞盧世榮有罪誅死禿魯歡參知政事十二月辛丑荅卽古阿散有罪及其黨蔡仲英李蹊皆棄市丁未皇太子薨辛酉立集賢院是歲詔放占城參知政事亦黑迷失軍還

二十三年春正月戊辰朔以皇太子故罷朝賀禁齋金銀銅錢越海互市甲戌罷征日本軍庚辰馬八兒進銅盾丁亥焚陰陽僞書顯明秣丁酉田於近郊二月己亥敕漢民凡鐵尺手槌及杖有刃者悉輸官甲辰以雪雪的斤爲緬中行省左丞相阿台董阿參知政事荆湖占城行省兼行安南省事進阿里海牙行省左丞相乙巳復立大司農司丙午立按察司巡行郡縣法戊午封陳益稷安南國王命阿里海牙以兵納之三月乙亥麥朮丁復爲右丞江西

參知政事楊居寬參知政事丙子如上都夏四月庚辰制謚法六月戊申括諸路馬庚申辭閣平章政事罷征安南陳益稷從師還鄂秋七月己巳立營田總管府於江南以覈官田壬午左丞相寶吉刺帶平章政事阿必失哈忽都魯並罷參知政事帖木兒爲左丞癸巳定省部臺院官制八月永康人陳巽四謀反伏誅九月乙丑太廟雨壞遷神主於別殿馬八兒須門那僧急里南無力馬蘭丹那旺丁呵兒來來急蘭亦帶蘇木都刺十國各遣使來貢壬申高麗遣使獻日本俘冬十月甲午詔獎賢能吏襄邑縣尹張玘鄒平縣達魯花赤和進秩有差丁酉享於太廟己亥至上都辛亥河決南京十五處調民夫分塞之甲寅脫滿答兒爲都元帥張萬爲副都元帥以征緬十一月己巳更以來阿八赤爲安南行省右丞是歲以僧亦攝思憐爲帝師海都犯別失八里伯顏率都

元帥綦公直與戰於洪水山敗之公直追遠反爲所陷

二十四年春正月浚河西務漕渠癸酉俱藍遣使入朝丁亥不顏里海牙參知政事辛卯詔復征安南奧魯赤平章政事烏馬兒樊楫並參知政事行安南省事仍以鎮南王脫歡節制諸軍是月緬王爲其庶子所囚二月甲午田於近郊乙未右丞麥朮丁平章政事甲辰范文虎爲右丞商議樞密院事壬子封駙馬昌吉甯濮郡王戊午趙與芮子孟桂襲封平原郡公閏月癸亥赦歲春秋仲月上丙日祀帝堯廟西京管課官馬合謀有罪棄市乙丑田於近郊復立尙書省總制院使桑哥左丞帖木兒並平章尙書政事集賢大學士阿里渾撒里爲尙書右丞葉李爲尙書左丞刑部尙書馬紹參知尙書政事辛未立江南各路儒學提舉司甲申車駕還宮罷江南竹木柴薪及岸例魚牙諸課鎮南王脫歡徙鎮南京吏部

尚書忻都參知尚書政事改行中書省爲行尚書省庚寅如上都
三月甲午更造至元寶鈔禁無籍自效軍擾民仍籍充軍丙辰馬
八兒進奇獸阿塔必卽命都水監開汶泗水以通漕汴梁河溢隄
之夏四月乃顏大王勢都兒大王也不干大王合丹大王等反五
月上白將討之六月壬戌敗乃顏軍於撒兒都魯乙亥幸失刺斡
耳朵獲乃顏輜重是月御史大夫玉昔帖木兒漢軍都元帥李庭
追乃顏獲之乃顏伏誅欽察親軍指揮使土土哈及也不干戰於
孛恰嶺大敗之秋七月帝回鑾玉昔帖木兒李庭討乃顏餘黨金
家奴塔不歹等平之皇子愛牙赤遼東宣慰使塔出討平勢都兒
免東京徭賦八月乙丑車駕還上都更以李海刺孫爲征緬行省
參知政事置江南四省交鈔提舉司己巳詔謫諸王益吉刺歹於
婺州凡諸王從叛者並謫之江南從軍自效癸酉朵兒朵海獲叛

王阿赤思赦之丁亥免濬州今歲絲稅田租女人國貢海人九月
丁未安南來貢壬子高麗國王暗來朝是月合丹及火魯火孫王
等復入寇咸平懿州及大甯愛牙赤王等擊敗之冬十月戊午朔
日有食之丙子殺參知政事郭佑楊居寬籍其家羅北甸土官內
附丙戌平章中書政事辭閣下出行遼陽尚書省事十一月壬辰
雲南右丞愛魯破安南兵於木兀門獲其將黎石何英平章政事
桑哥爲尚書右丞相右丞阿魯渾撒里平章尚書政事左丞葉李
爲尚書右丞參知政事馬紹爲尚書左丞己酉封駙馬帖木兒濟
甯郡王壬子詔江南四省招捕盜賊十二月鎮南王脫歡渡富良
江逼其都日烜棄城走敵喃堡是月辭徹都王地雨土七晝夜羊
畜死是歲雲南王也先帖木兒督諸軍征緬破其都緬降詔留也
先帖木兒鎮之

元書 卷五
二十五年春正月鎮南王脫歡軍至敢喃堡日烜復走入海庚寅祭日於司天臺戊戌大赦弛遼陽漁獵禁惟毋殺孕獸癸卯海都犯邊詔諸王朮白帥師並發甯濮郡王昌吉等兵北征掌吉舉兵叛諸王拜答罕遣將追之不及而還甲辰也速不花謀叛伏誅丙午田於近郊癸丑詔農田官巡行勸課舉察勤惰募能耕江南曠土及公田者寬其租役二月詔御史大夫玉昔帖木兒及中書左丞李庭率漢軍以討合丹己卯高麗王晳復爲征東行省左丞相壬午雲南王也先帖木兒還鎮大理三月戊子車駕還宮庚寅如上都詔遼陽行省亦乞思列等自懿州東征是月鎮南王脫歡引兵還安南兵遮東關行省右丞來阿八赤中毒矢卒日烜尋遣使謝罪徐邳雨雹如卵夏四月渾河決發卒塞之甲申詔皇孫鐵木耳撫諸軍以討諸王反者五月戊子牀兀兒執諸王察罕子闊闊

帶以來己丑河決襄邑戊戌王家奴火魯忽帶察罕復舉兵反丁未奉安神主於太廟辛未孟州雨雹如拳癸丑河決汴梁六月戊辰海都將暗伯著煖犯業里干腦兒管軍元帥阿里帶戰卻之壬申睢陽河溢是夏帝親征合丹幸兀魯灰河秋八月右丞相安童以本部怯薛蒙古軍三百人北征九月壬辰車駕還宮乙未篤哇犯邊庚子江淮左丞相忙兀帶迫南臺御史中丞劉宣自殺鬼國建都各遣使來獻方物立徵理司冬十月己未享於太廟庚申遣使鉤考諸路錢穀庚午海都犯邊丙子瀛國公趙曩學佛於土蕃己卯也不干入寇塔不歹及忽刺忽阿塔海戰卻之詔免儒戶雜徭十一月丁亥山東提刑按察使何榮祖參知中書政事金齒來貢庚寅牀哥里合犯建州殺三百餘人癸巳也速帶兒執叛王捏坤忽都荅兒以歸己亥立尙書左丞相桑哥德政碑辛丑馬八兒

遣使來貢帖列滅入寇甲辰改釋教總制院為宣政院丁巳海都復犯邊拔都也孫脫迎擊戰沒丙子也速不花以失烈門叛獲歸京師是冬御史大夫玉昔帖木兒入黑龍江擊合丹走之是歲左丞李庭改尚書左丞商議樞密院事江南諸路盜起廣州董賢舉循州鍾明亮至各擁眾萬餘人掠江西廣東福建各路州郡二十六年春正月丙戌地震辛卯合丹入寇開安山渠二月籍江南戶口濬滄州御河詔福建行省拜降江西行院月的迷失江淮行省忙古帶合兵擊羣盜丁卯如上都以伯顏知樞密院事鎮和林伯答兒平章中書政事合丹兵寇胡魯口開元路治中兀顏牙兀格連戰破之三月庚辰朔日有食之台州楊鎮龍反有眾十二萬寇浙東自稱大興國置官屬諸王益吉刺反自婺州帥兵討之夏四月庚午沙河決發民隄之甲戌御史大夫玉昔帖木兒為太

傅始立浙東江東江西湖廣福建木縣提舉司五月發親軍濬河西務漕渠以至通州丙申鍾明亮董賢舉等降參知政事忻都為尚書左丞中書參知政事何榮祖參知尚書政事參議尚書省事張天祐參知中書政事己亥立回回國子學辛丑御河溢入安山渠六月己未西蕃進黑豹庚子乃蠻台王敗合丹兵於托吾兒河丙寅要忽兒犯邊辛巳海都犯邊和林宣慰使怯伯同知乃蠻帶副使八黑鐵兒皆反應之乙亥金剛奴寇折連怯兒其月皇孫甘麻刺及海都戰於沆海嶺失利秋七月戊寅帝親征辛巳雨壞都城發兵民完之賜安山渠名會通河戊子太白經天辛卯詔搜訪江南藝術之士癸巳沙河溢八月癸巳歲星晝見九月己卯立高麗儒學提舉司是月沿江行院史弼討斬楊鎮龍冬十月丙辰禁百官受人饋酒食者閏月戊寅車駕還宮月的迷失以降人董賢

元書 卷五
舉邱應祥等歸於京師西南生番內附鍾明亮復反以萬人寇梅州江羅等以八千人寇漳州韶雄二十餘處應之丁亥安南來貢己丑詔籍江南及四川戶口婺州葉萬五以眾萬人寇武義殺千戶江淮平章政事不憐吉解將兵討之辛丑羅斛女人遣使貢獻乙巳緬人貢獻十二月辛巳括天下馬丁亥封皇子闕闕出甯遠王

二十七年春正月乙卯造祀天幄殿己未章吉寇甘木里諸王朮白拜荅寒亦憐眞等擊走之辛未復立興文署合丹寇海陽二月癸未泉州地震乙酉又震己未鍾明亮等降詔諸盜首皆送京師而給其餘黨糧各二月夏四月癸酉如上都丙戌詔求方技士於馬八兒國庚子合丹復寇海陽五月乙巳寇開元戊午立雲南銀場官庚午括天下陰陽戶口令各路歲貢精藝者一人其月浙東

宣慰使史弼平處州盜六月壬申河溢太康甲戌桑州那州安郡州皆內附己亥棣州大風雹秋七月癸丑罷緬中行省八月辛卯朔日有食之癸巳地大震武平官民死七千餘人九月壬寅申嚴漢人田獵之禁乙巳平章政事昔刺帖木兒及合丹戰於瓦法大破之丁未御河決高唐命有司塞之丙辰赦天下冬十月壬申封皇孫甘麻刺梁王鎮雲南梁吳曲等二十洞內附己丑新作太廟登歌宮縣樂十一月乙丑易水溢丙寅括遼陽馬是冬合丹走高麗是歲參知尙書政事何榮祖罷爲集賢大學士牙忽都及海都戰軍潰奔還封牙忽都爲鎮遠王封波斯王合贊爲靖遠王二十八年春正月辛酉罷江淮漕運入海船萬戶府壬戌尙書右丞相桑哥平章尙書政事阿魯渾撒里帖木兒尙書右丞葉李皆罷二月丙子罷徵理司丁丑太子右詹事完澤爲尙書右丞相翰

元書 卷五
林學士承旨不忽木平章尙書政事癸未如上都丙戌改提刑按察司爲肅政廉訪司集賢大學士何榮祖復爲尙書右丞集賢學士賀勝參知尙書政事辛卯封諸王帖木兒不花肅遠王壬辰雨壞太廟第一室奉遷神主別殿丁酉詔加嶽瀆四海封號遣官祭告三月己亥桑哥弟黨燕南宣慰使八由吉坐積贓論死仆桑哥德政碑辛酉起紫檀殿壬戌甘肅右丞崔彧爲中書右丞夏四月己巳禁屠牝羊五月戊戌參知政事廉希恕出爲湖廣右丞及瓊州安撫使陳仲達並行海北海南道宣慰使都元帥以征黎蠻甲辰桑哥妻黨湖廣平章政事要束木坐不法論死桑哥弟鞏昌宣慰使荅麻刺荅思有罪自殺八吉等發兵塞晃火兒月連河渠修城堡合蒙古戍兵屯田川中以禦寇癸丑復罷尙書省入中書完澤爲右丞相麥朮丁不忽木並平章政事何榮祖爲右丞馬紹爲

左丞賀勝高翥並參知政事丁巳頒行至元新格己未門荅占爲御史大夫秋七月丙申興建都金治丁巳桑哥伏誅募耕江南曠土五頃爲永業遣慈散總兵討平江南盜賊己未雨壞都城發兵築之八月乙丑平陽地震己巳馬八兒進花牛水牛土彪戊子俱藍進金葉書寶塔黑師子番布藥物九月辛未詔麥朮丁商議中書省事咱喜魯丁代爲平章政事辛亥安南入貢並謝罪冬十月己巳修太廟在眞定傾壞者癸未羅斛遣使上金字表奉貢黃金象齒丹頂鶴五色鸚鵡翠毛犀角篤耨龍腦十一月丁未就羅貢東紵十二月甲戌罷鉤考錢穀癸未別都魯丁復爲左丞丙戌八番詣闕貢獻戊子詔釋天下囚非殺人者辛卯濟運糧壩河哈刺思八斡節兒爲帝師是歲右丞崔彧改御史中丞封也先鐵木兒鎮東王乃蠻台王及遼陽平章政事辭閣干追討合丹於高麗

平之

二十九年春正月甲午朔日有食之狀如環詔免朝賀二月丁卯田於近郊己巳詔禁鞭背庚午柔州生苗羅甸古州等洞三十一所詣闕貢獻壬申赦殊死以下乙亥詔泉府太卿亦黑迷失浙東宣慰史弼福建右丞高興並行福建平章政事以征瓜哇加高麗國王嗜太保錫號功臣詔從諸王阿而禿作亂者朵魯帶以付曲里吉思脫迭出以付阿里鈔兒赤以付月的迷失合麥以付亦黑迷失使從軍自效又詔從合丹作亂者納答兒之鎮南王脫歡所聶怯來之合刺合孫所阿而禿之雲南王也先帖木兒所朵列禿之阿里所八里帶之月的迷失所幹里羅忽里帶之東海三月丁未尙書左丞忻都戶部尙書王巨濟江浙
納速刺丁滅里並有罪誅死己酉麥朮丁何榮祖辭疾命免署仍與議中書事

大司農同知宣徽院兼領尙膳監事鐵哥翰林學士承旨通政院使兼尙乘寺刺真並平章政事仍兼舊職阿里爲右丞梁德珪參知政事詔授安南國王陳益稷湖廣平章政事居鄂州庚戌如上都夏四月弛太原甘肅酒禁仍榷酤立雲南諸路學校五月丁未詔雪楊居寬郭佑還其貲六月鐵旗城後察昔折乙烈舉部來附閏月罷福建歲造象齒鞞革知上思州黃勝許反據忠州甲寅右江岑從毅降詔廉訪司巡行勸課農桑秋七月完大都城壬申建社稷壇飾以五方色土八月己丑廣南西路安撫使賽甫丁有罪論死甲辰至上都浚通州至大都漕河詔不敦忙兀魯迷失帥師征八百媳婦九月茹雞十圍安化等洞蠻來附設管軍民司治之光蘭州洞蠻來附立定遠府治之明里帖木兒王叛附於海都伯顏大破之於阿撒忽禿嶺冬十月開上都酒禁丙申四川洞酋

向思聰等入朝甲辰新合刺的音遣使入覲十一月丙戌錦州提
省溪銅人洞酋楊秀朝等來獻方物十二月改封梁王甘麻刺爲
晉王鎮北邊罷甯國路銀冶木忽魯甸金齒土官忽魯馬男阿魯
來入貢方物辰州蠻叛討平之劉國傑拔象山寨黃勝許走安南
安南匿之是歲加玉昔帖木兒錄軍國重事

三十年春正月敕福建勿進鶻洛波卜兒二蠻授知州庚午驗洞
酋楊總國入朝乙亥諭皇太子曰明孝二月丙子卻江淮行院進
鷹敕自今軍官勿從禽擾民丁未如上都以洞蠻吳動鼇爲潭溪
軍民長官辛亥詔安西王阿難荅征土蕃三月庚申札散進知樞
密院事上都雨壞其城發侍衛軍完之給其傭直甲子括天下馬
是春土土哈踰金山進收乞里吉思敗海都之兵於謙河獲其將
孛羅察夏四月瓜哇降復反亦黑迷失等失利而還西南夷光州

邦崖光龍王文顯等二百一十七人各授蠻夷官賜璽書五月壬
戌定雲洞蠻來附六月乙巳以皇太子寶授皇孫鐵木耳總兵北
邊命伯顏還屯大同玉昔帖木兒代將以輔皇孫己酉易州雨雹
如卯己未以皇曾孫松山出鎮雲南賜以皇孫梁王印己巳也只
里王督劉國傑諸軍以討安南壬申月赤察兒知樞密院事丁丑
賜新開漕渠名通惠河八月括荒田九月癸丑至上都庚寅有
彗星入紫微垣甲辰赦天下十一月己卯河南江北平章政事伯
顏平章政事十二月壬辰左丞馬紹以疾告歸詹事丞張九思爲
左丞其月召伯顏於大同

三十一年春正月壬子帝不豫免朝賀癸亥知樞密院伯顏還自
大同癸酉帝崩於紫檀殿壽八十葬起輦谷

論曰世祖崇儒重道而特進言利之臣三進三亂而訖不悟豈非

其明有所蔽耶然其不欲剝民亦審矣殆以為自我作則將上下均足堪為後世經制也嗚呼以世祖之仁乘開國之運而言利之弊若此然則利其有可言者耶至其任中書樞密而重臺綱法紀立矣國治民安是在知人哉

新甯劉能紀 刊

門人曾傳瀚襄校

門人曾士琮詳校

元書卷五下

